

東

華

錄

東華錄

雍正十四

臣王先謙敬編

臣周澐蔭恭校

雍正七年己酉春正月丙午朔諭蒙古王等朕思從前所定外藩扎薩克蒙古王等之俸祿比於內地王等較少者必非以內外之故遂有多寡之分也或因爾蒙古王等人員眾多且在外藩居住費用尚爲儉約而國家錢糧亦或不敷之處故將爾等俸祿從少定議耳今朕恭承 上天垂佑 聖祖仁皇帝貽庥天下太平無事數年以來屢登豐稔國家錢糧頗爲饒裕朕爲統馭天下萬物之主凡事當周詳籌畫而行爾蒙古王等以下扎薩克一等台吉以上之俸今著概行加增一倍賞給再平常一等台吉從前俱無俸祿今亦著照扎薩克一等台吉等所食百金之俸賞給此乃

朕特行加恩爾等之處朕亦不敢遽爲定例總以國家錢糧之出入敷與不敷爲定耳嗣後著戶部理藩院於每年歲底將仍給與厚俸或加賞之處會同具奏請旨朕於臨時酌降諭旨○庚戌諭吏部臺灣地方遠隔重洋全在府道廳縣各得其人而該員又須熟悉風土情形殫心辦理於地方始有裨益向例人員以三年爲滿後經原任總督滿保條奏將三年任滿之員加銜再畱三年所以慎重海疆俾諳練之人久於其任也今據總督高其倬摺奏臺灣以六年爲滿而調任之時渡海而往卽須數月任滿之後候缺挨升以及交盤渡海又或一二年不等是前後合計須八九年且臺灣之例不帶家口其父母妻子隔越海洋未免有所牽挂應否請以四年爲滿等語朕思臺灣道府廳縣等官自宜選用熟習諳練者然定期六年爲滿又加以候缺交盤渡海之期實爲太久今

再四思維臺灣人員自到任之日爲始將滿一年之期著該督撫於閩省內地官員內揀選賢能之員乘冬月北風之時令其到臺新舊協同辦理半年之內大約可以熟悉地方情形則令舊員乘夏月南風之時回至內地補用將來接任之員俱照此更換該員到臺協辦之時俱一體算俸並給與俸銀及養廉之項如此則該員在臺前後不過二年爲期甚近而更換之員先後協辦又可習練地方事宜似有裨益其道府大員作何請旨揀選同知以下等官作何銓選調補及量加議敘之處該部詳悉妥議具奏○辛亥雲貴廣西總督鄂爾泰奏十月二十九日恭遇 萬壽令節滇南省城五色卿雲光燦捧日經辰巳午三時至十一月朔絢爛倍常凡呈見兩日隨據布政使張允隨詳稱楚雄府之楚雄廣通兩縣姚安府之姚州及大姚定邊兩縣又順甯府知府傳達等先後呈

報皆同誠從來未有之嘉瑞諭朕每遇此祥瑞蒙 上天慈恩自應感喜然實絲毫不敢慶幸惟倍加敬畏之心況此嘉祥實係卿忠誠所感而獻於朕壽日者正表卿愛戴之心也○壬子調元展成爲廣西按察使常安爲雲南按察使○癸丑諭戶部朕聞糧船過淮所費陋規甚多有一幫費至三四百金者旗丁旣多苦累勢必多索於民甚爲漕政之弊嗣後著派御史二員前往淮安專司稽察之任不許官吏人等向旗丁額外需索以致擾累其糧艘攜帶物件除照例許帶外該旗丁如有夾帶私鹽及違禁等物者亦著該御史稽察但不得過於吹求以致糧運遲滯至糧船抵通之時其該管衙門官吏及經紀車戶人等恐有額外需索陋規者亦著派御史二員前往稽察差往淮安之員著於二月初派往差往通州之員著於三四月內派往不必拘定滿漢各一員著都察院

按期開列請旨○甲寅諸王大臣等以滇省卿雲呈見上表奏賀並請宣付史館得旨朕治天下以實心實政爲務不言祥瑞屢頒諭旨甚明今據雲貴廣西總督鄂爾泰摺奏恭逢萬壽令節雲南四府三縣卿雲呈見又引孝經援神契之語曰天子孝則卿雲見朕之事親不敢言孝但自藩邸以至今四十餘年誠敬之心有如一日止此一念可以自信朕每承天眷昭示嘉祥感激慶幸之中益加儆惕茲逢卿雲之瑞實愈增朕之敬畏鄂爾泰公忠體國實爲不世出之名臣數年來節制滇黔等省化導所屬官吏人人奉公盡職懷忠君親上之心是以仰邀天貺卿雲見於滇省正所以表著該省官吏敬恭協和之忱悃也此則朕心深爲嘉悅者今諸王大臣等奏請宣付史館朕之允行者非欲誇示於眾也蓋以天人感召之理捷於影響該督正己率屬有忠愛之丹誠則該

省受福迎祥有光昭之瑞應朕願內外大小臣工均以鄂爾泰爲法且願遠近各省官民等聞風慕義興孝勸忠人人共受上天之福佑乃朕心之所謂上祥大瑞也○丁巳諭內閣滿漢內閣大學士俱各全備辦理事務亦甚屬妥協無容再爲增添朕因 聖祖仁皇帝時所有年老大臣目今在朝者甚少時深注念禮部尙書陳元龍左都御史尹秦歷事 聖祖仁皇帝多年屢經任使今雖年近八旬而精力尙健特加恩授爲額外大學士以示朕優眷老臣成全耆舊之至意○以牧可登在刑部額外侍郎內行走由司業遷○戊午諭內閣大學士陳元龍之子陳邦直向以年少輕浮罷斥回籍今經數年諒已悛改朕念陳元龍年近八旬止此一子又在原籍無人侍奉著將陳邦直復還編修之職令其來京交與伊父教誨管束並令掌院學士時加訓導以玉成之○己未命臺灣戍

卒家在內地者歲發帑金四萬兩養贍之○晉封科爾沁輔國公
烏爾呼滿爾爲貝子○庚申諭禮部山川之神錫福於地方百姓
是以自古帝王皆誠心展祀以答神貺卽如向來盛京之地旱潦
不時者凡六載康熙五十九年朕奉 皇考命躬詣 祖陵道經
山麓謁北鎮廟潔蠲致祭因捐貲庀工載修廟宇屬令地方官員
虔恭致祭自康熙六十年以至於今盛京年穀悉登豐稔又如黃
河之神虔誠禱祀果見安瀾有慶萬姓甯居皆神祇垂佑顯然昭
著纖毫不爽者此蓋舉目前一二事而言其他難以枚舉也古稱
江海爲百川之長而湖廣境內西南數省之水匯入大江又爲川
澤之總會凡屬地土人民及舟楫行旅皆仗江神默佑保護安甯
允宜修建廟宇按時致祭以崇報享著湖廣總督會同湖北湖南
巡撫確查妥議南北兩省應於何處各建廟宇或舊有祠廟敬謹

興修皆動支公帑辦理此朕虔禱神祇護國佑民之意並非諂媚以求一己之福也並令該督撫曉諭居民不得私結社會妄事祈求以滋褻慢○己巳諭內閣雲貴廣西總督鄂爾泰節制滇黔公忠體國化導所屬官吏奉公盡職是以天錫卿雲之瑞應表著該省官員敬恭協和之忱惻鄂爾泰及提督郝玉麟表率訓導通省文武屬員而滇黔兩省官員均能遵奉上司之教誨殫心奉職應加特恩以示優獎鄂爾泰著由一等阿達哈哈番超授爲三等阿思哈尼哈番郝玉麟著由拖沙喇哈番授爲拜他喇布勒哈番滇黔兩省巡撫提督總兵官俱著加二級文官自知縣以上武官自千總以上俱著加一級凡受恩賜者益當敬謹黽勉以仰承上天之貺從茲遠近臣工感慕興起則人人受福凝祥矣○壬申諭內閣朕覽 太宗文皇帝實錄噶爾薩之曾祖父額駙恩格德爾乃

係 太宗文皇帝時有偉績殊勲身膺厚恩之人原係三等公因削去恩詔所加官職授爲侯爵朕念恩格德爾舊日功績仍賞給所削官職授爲三等公著噶爾薩承襲俾其子孫世襲罔替○諭朕令各州縣歲舉老農給以頂帶榮身乃勸民務本力田還醇返樸之至意爲有司者自當仰體朕心恪遵諭旨擇其謹慎勤勞身無過舉者據實保送以爲萬民勸乃朕聞直省之舉老農也州縣憑紳士之保舉紳士納姦民之貨財上下相蒙苟且塞責而強有力者倖邀頂帶之榮遂成暴橫之勢深負朕勸農務本之意著直省督撫確實查明將冒濫生事之老農悉行革退另選題補從前有保舉不公或因賄屬情面營求而得者准老農本身及保送之官員自行出首朕從寬免其治罪但革去老農頂帶若此時不行自首各州縣官員又不行查出日後發覺定從重治罪該督撫等

一併議處○諭刑部凡屬獲罪之人稍有一綫可寬者朕皆原情矜宥而於大臣等尤多格外開恩之處四格黨附蘇努不知愧恥以蘇努之大姦大惡爲國家巨蠹而四格依附交結甘心出其胯下伊繼蘇努都統之任將蘇努惡蹟概爲隱瞞已屬可惡蘇努竟敢將 聖祖仁皇帝硃批摺子塗抹褻慢臣工見之無不驚駭髮指似此大不敬之罪而四格代爲容隱四格之罪誠不可逭是以照法司所擬將伊監候秋後處決昨朕恭閱 太宗文皇帝實錄見四格之祖莽古爾岱當日誠心效力懋著功勳四格不念其祖爲開國功臣黽勉自立而甘爲下流干犯國憲此乃自作之孽但朕心實念伊祖昔日之勤勞不忍將伊置之重典四格著從寬免罪釋放爾等將朕旨傳諭四格知之○以直隸古北口提督楊鯤協辦直隸總督○宗人府奏宗學教習期滿之舉人貢生請予議

敘得旨宗學教習期滿之時自應加恩議敘除舉人係應選知縣之員照原議銓選外其貢生等善於訓課未必嫻於吏治者一概用爲知縣不但於吏治無益而本人不能辦事致干參處亦非所以成全之也凡各處教習之貢生等著於期滿之時該管衙門帶領引見或用爲知縣或用爲教官候朕頒發諭旨因材器使將此通著爲例○癸酉諭禮部士子者百姓所觀瞻士習不端民風何由得厚是以考課士子設立舉優黜劣之典以爲移風易俗之道所關亦綦重矣無如教官愚懦無能學臣因循苟且往往視爲具文奉行不力每當學臣按試之時教官輒以無優無劣具文申詳草草塞責如此則善者何由而勸不善者何由而懲夫善者之湮沒不彰一時尙難覺察而不善之人僥倖苟免於目前不旋踵而劣蹟敗露每見蕩檢踰閑犯法亂紀之士子皆從前學臣教官之

未曾開報劣行者其間情罪雖難一一追究然卽此可知其中之容隱不少矣嗣後若敎官沽名邀譽縱容劣生不行舉報者經學臣察出立即指參將敎官照溺職例革職若學臣瞻徇情面不行糾參者一經發覺將學臣照徇庇例降級調用著將此永著爲例○諭工部平治道路王政所先是以周禮有野廬合方之職自四畿達之天下掌其修治俾車馬所至咸蕩平坦易行李輻輳津梁通達無雨水阻滯之累邇年以來廣甯門外已修石道其至通州運糧之路亦修整高潔往來行人頗爲便利今直隸至江南大道車輪馬迹踐壓歲久致通衢竟成溝塹兩旁之土高出如岸一遇雨水之時眾流匯歸積潦難退行旅每苦泥濘或致守候時日朕心深爲軫念但此通行大道已久成窪下勢難培築增高而大道之旁高埠甚多平治亦殊不易若於大道相近之處另開一道工

力似屬易施其閒或有地形斷續之處應修建橋梁或有溝塍淤積之處應疏濬水道或所開之徑有借用民間田地者應補給價值並除錢糧或繞行之路有遠隔村莊旅舍者應引歸故道使有頓宿是非熟於相度地勢歷練道徑之人不能詳察妥當特派工部侍郎法保副都統韓光基原任護軍統領喀爾吉善二等侍衛特庫四員於今年夏秋之交自京師起程由良鄉至宿遷大道一路踏勘將如何另開新道之處詳悉議定估計工費繪圖呈覽○命陳元龍爲文淵閣大學士兼禮部尙書尹秦爲東閣大學士兼兵部尙書○甲戌巡察山東御史蔣洽秀題參利津縣知縣李周定陶縣知縣張釗奉行保甲不力請交部議處得旨數省之中差遣御史巡察盜案驛站者蓋因地方遼闊督撫未能徧歷其境而御史便於巡行訪察或可補督撫耳目之所未及並非令御史操

參劾之柄侵督撫之權也今蔣治秀以不力行保甲參奏知縣二人是顯欲自作威福侵督撫之權矣夫保甲社倉二事本屬善政然行之必以其漸令州縣量力爲之始於地方有益而閭閻不擾是以數年以來朕未降旨督催蓋恐急遽之中奉行不善轉滋民間之累也將治秀以兩縣知縣不力行保甲特疏糾參伊所巡察之各州縣果盡能奉行保甲之法無遺憾乎山東地方已在總督田文鏡節制之內屬員優劣地方事務自能訪察亦可不必要設巡察御史若將蔣治秀撤回

二月丙子朔諭科道等官爾等職司言路邇來並不陳奏一事以此觀之爾等科道官除徇私報復黨同伐異之外遂無可言之事矣朕從前令爾等輪奏密摺大有深意因催致遠等不堪小人妄行瀆奏是以將密摺停止令爾等露章明言凡有關於國計民生

用人行政之事爾等何一不當據實奏聞乎明季吏治之壞多出科道巡按結黨營私紊亂是非所致朕勵精圖治耳目甚廣雖不專恃爾等但爾等身居言路自當盡其職守外而督撫以及州縣內而部院八旗五城等衙門如有不法及不稱職之人聞見確實皆可參奏使朕躬或有過失更當直陳極諫爾等何竟默無一言爲臣之道惟在公忠如自揣不能供職卽當引退何得苟且因循有曠職守嗣後其共勉之○丁丑實授尹繼善江蘇巡撫署江南河道總督以王璣署江蘇巡撫仍兼管清查錢糧事○戊寅以武格爲陝西西安巡撫調王朝恩爲盛京刑部侍郎以永福兼管盛京戶部侍郎事

由盛京兵部兼管

○以永國爲盛京禮部侍郎

由內閣侍讀學士遷

○命吏部尙書查爾阿協辦陝西軍需事務○吏部議覆直隸總督何世璠參奏遷安縣知縣王孔彰失察礦徒應降一級畱任勒

限一年緝獲典史劉然無級可降應革職畱任協同緝拏得旨凡文武微員其過愆本不至革職因無級可降而遽行革職似屬太過况遠省微員罷斥回籍路費艱難更覺可憫其微員罪止降調無級可降者作何酌量仍畱原任定以年限開復之處著吏兵二部詳悉定議具奏尋議文職從九品未入流武職七品等官實係無級可降之員舊例應降級畱任者則議革職畱任今改爲降級畱任應降級調用者則議革職今改爲革職畱任以示矜惜微員之意俟三年無過准其開復其各部衙門筆帖式並旗員六品七品八品官俱照此定議從之又議覆臺灣各缺向例三年任滿稱職者加升銜再畱三年方准升用該員家屬格於成例不得帶往難免繫念今奉旨調往各官到任一年令督撫於內地揀選賢員到臺協辦半年後卽令舊員回至內地補用海疆旣得諳練之員

而各官又免瞻顧之慮應永著爲例至協辦人員旣從內地調往則內地員缺需員署理應於每年七八月間由臣部請旨照臺地道府同知通判知縣等員揀選人員命往以備調補委署之用凡調往各員期滿之日政績優著者准加二級稱職者加一級以示鼓勵至經歷縣丞以下及敎職等官事務簡少無庸委員協辦應照定例三年稱職咨部以應升之缺卽用但在任候升亦未免稽遲時日應令該督撫查明各官將滿三年之時於內地豫行揀選調往令俸滿者回至內地候升再在臺人員其見滿三年者於調回內地時照舊例升用其先經加銜再畱任三年者亦於調回內地時按伊等再畱年分分別議敘從之○庚辰諭內閣齊蘇勒練達老成深悉河工事務是以授嵇曾筠爲副總河專管北河而令齊蘇勒兼理南北兩河之事今尹繼善新管河務朕意欲令其與

稽曾筠分任南北兩河又思治河之道必合全河形勢通行籌畫方可疏導安瀾若分令兩員管理恐有推諉掣肘之處著怡親王大學士等會同署江蘇巡撫王璣及九卿內本籍江南河南山東之人通曉河務者詳悉速議具奏○予故直隸總督何世璽祭葬諡端簡贈禮部尚書賞銀一千兩○辛巳諭內閣考官專司衡文之任必須學問明通者始能鑒別不爽雍正三年曾將在京科目出身應充正副考官之員通行考試分別等次記名於雍正四年掣籤命往各省使典試事今已越三年從前考取人員其中升遷外任及告假回籍者甚多卽有在京者其所學或以日久荒疏而前此之未曾入選者今用數年之功文藝未必無所進益且陸續新到之員亦復不少著照雍正三年之例通行考試俟朕分別記名以備持衡之任有不願就試者亦聽其意○加故河道總督拜

他喇布勒哈番齊蘇勒爲三等阿達哈哈番照例承襲並賞銀三千兩予祭葬諡勤恪○壬午諭內閣歷來河道總督如靳輔齊蘇勒二人實能爲國宣勞又安百姓合於有功臣祀典之例著尹繼善等就近相度地方合建祠宇有司春秋祭祀以副朕優獎功勳之至意○設福建觀風整俗使一從禮部右侍郎蔡世遠請也○癸未諭內閣江南蘇松等處錢糧歷年積欠至一千六百餘萬兩之多朕已加恩將康熙五十年已前未完者概行豁免其自五十一年以後應徵之項又復寬限分爲十年至十五年帶徵原冀民力寬紓易於輸納也乃數年以來仍不能依限全完因思此等逋賦其實欠在民者固多而爲官員侵漁及吏胥土棍中飽者亦復不少若不確查詳覈明白分晰則此事難以辦理今特差大臣會同巡撫藩司及清查虧空之御史總理其事又遴選大員專界

以分查各府之任再揀選州縣分派各處務令徹底清釐但念錢糧爲數繁多而積弊歷年已久侵蝕之官吏人等甚眾其中情節亦有不同在官者或因奏銷之時原有民欠而顧惜考成那移報完及徵收民欠之後隨手花費未曾還項遂捏稱尙欠在民或交代之際有已徵未解之項乘機隱匿而接任之員不及查明遂仍作民欠收受其在吏胥土棍者或舞弊作奸暗行偷盜或廣爲包攬私入己囊又或鄉居寫遠之民難於入城託其代爲納課而一時川去遂成逋欠此皆情事之所有者今旣徹底清查則水落石出從前玩法隱匿之案勢必盡行敗露均有難逃之重罪然朕心實不忍伊等之盡罔國典是以特降諭旨凡侵蝕錢糧之官吏人等准其自行出首有能據實自首毫無隱匿者從寬免其治罪其所欠錢糧仍照從前帶徵之限分年交納若官吏本身已故其妻

子嫡屬等自必悉知情由亦令自首免罪一體寬限帶徵此朕法
外之仁所以保全伊等之身家性命儻仍怙惡營私執迷罔悟不
行自首或首而不實則天譴國法均難脫漏尙可倖免乎定將伊
等照律科斷所有侵蝕之項於一年限內監禁嚴追如逾限不完
卽依擬治罪著欽差大臣巡撫等刊布朕諭務令所屬官吏軍民
人等及遠鄉僻壤共知之○甲申 上謁 陵啓鑾○以原任吏
部右侍郎協理直隸總督劉師恕補授內閣學士爲福建觀風整
俗使○丁亥 上謁 昭西陵 孝陵 孝東陵○庚寅 上回
鑾○壬辰諭內閣朕惟雲雨風雷之神代天司令俾百昌萬寶普
含膏澤以錫福於烝民厥功並懋朕恭承 天眷恪修祀典爲四
海蒼黎仰祈嘉佑已經特建廟宇崇祀龍神風伯而雲師雷師尙
闕專祀嘗考虞書禋於六宗之文漢人以乾坤六子釋六宗震雷

異風均列禋祀而易曰雷以動之風以散之則風雷之發生萬物功實相等禮記曰天降時雨山川出雲周禮亦以五雲辨年歲是雲與雨皆運行造化同昭天貺者也前代及本朝南郊大祀雲雨風雷俱列從壇之次式隆配享典禮亦既備矣邇年以來雲物兆祥雷行應候茂育庶彙宣布陽和庇國祐民之德靈應顯然今欲特建廟宇虔奉雲師雷師之神因時禱祝敬迓洪庥以展朕爲民祈福之意其考據禮儀相度營建之處著禮工二部詳議具奏

○楊紹緣事革職以王驂爲直隸布政使由少詹事遷○癸巳諭諸王內閣九卿八旗大臣等準噶爾一部落原係元朝之臣僕其始祖曰額森額森之子托渾海至大員因擾亂元之宗族離間蒙古恐獲重罪遂背負元朝之恩逃匿於西北邊遠之處元末又煽誘匪類結成黨與遂自稱準噶爾肆行劫擄迨至我朝有噶爾丹策妄

阿喇布坦二人世濟其惡擾害生靈滅棄釋教造孽多端不可枚舉當我朝定鼎之初各處蒙古傾心歸順共輸誠悃請安納貢求爲屬國安享太平樂利之福八十餘年惟準噶爾一部落遁居西北五千里之外擾亂離間眾蒙古肆行劫奪噶爾丹身爲喇嘛不守清規不遵佛教破戒還俗娶青海鄂齊兒圖車臣汗之女爲妻後又潛往青海賊害伊之妻父鄂齊兒圖車臣汗擄其屬下人眾續因喀爾喀七旗內彼此稍有嫌隙奏懇 聖祖仁皇帝爲之和解因遣大臣同達賴喇嘛使者前往噶爾丹遣人暗探消息遂以喀爾喀等卑視達賴喇嘛使人爲辭遣伊族內微末台吉多爾濟查布將喀爾喀汗台吉等肆行陵辱喀爾喀汗等怒彼狂悖無禮會眾將彼殺害噶爾丹遂稱殺害伊弟多爾濟查布與喀爾喀構隙掩其不備發兵猝擊喀爾喀眾潰紛紛來投 聖祖仁皇帝深

爲軫念施恩育養遣使往噶爾丹處諭以兵爲凶器令其與喀爾喀和好多方開導詎噶爾丹冥頑不靈借追襲喀爾喀之名入犯邊汛彼時卽行剿滅復有何難我 聖祖仁皇帝好生爲德遣使責問噶爾丹惶愧恐懼設誓撤兵乃並不歸伊住牧之所仍潛居克爾倫圖拉地方暗行窺伺 聖祖仁皇帝復遣使降旨諭以應回原住牧地方噶爾丹佯稱遵奉諭旨仍乘隙潛掠沿邊蒙古之畜牧眾蒙古不獲安居我 皇考遂上告 天地親統大兵聲罪致討噶爾丹輒敢逆天與我西路大兵接戰伊軍大敗妻子被擒噶爾丹窘迫自殺彼時大兵卽行直搗巢穴收其部落我 聖祖仁皇帝恐天下後世有窮兵黷武之議因而中止策妄阿喇布坦者噶爾丹之姪也與伊叔噶爾丹不相和睦帶領七人潛逃至吐魯番地方居住 聖祖仁皇帝以策妄阿喇布坦向與伊叔不睦

懼其誅害遁迹逃生加以恩澤伊當感戴歸誠且 聖心仁慈不忍遣兵將噶爾丹餘衆部落悉行勦滅恩加格外遣使賞給策妄阿喇布坦彼時策妄阿喇布坦力弱勢微甚爲恭順其後離間伊之妻父圖爾古特之阿玉氣汗與其子三濟扎布誘三濟扎布攜帶萬餘戶至伊住牧之處因而強占入己從此遂不安分肆意妄行窺伺青海擾害生靈率領賊兵前進被哈密駐防輕兵擊敗遁回策妄阿喇布坦又假黃教爲名潛兵入藏無故殺伊妻弟拉藏汗毀壞寺廟殺害喇嘛搶掠供器是以特遣大臣前往詢問乃伊督不畏死阻兵拒命使臣率師甚少兵力單弱伊得以愈肆猖狂 聖祖仁皇帝仍賜包容諭令邊外兩路大兵緩進屢次遣使示以 聖意謂策妄阿喇布坦果能悔過懇恩具奏其時另降諭旨若仍怙惡不悛然後將此部落人衆悉行勦滅此我 聖祖仁皇

帝之本意也朕紹登大寶策妄阿喇布坦雖遣使求和朕知非伊本懷諭伊來使云爾歸告知爾台吉朕續承我 皇考大統爾台吉若欲受我 皇考天恩須得盡改前非遵朕諭旨定界安居若欲犯我 皇考天威任爾備兵前來定當加以天討如此降旨分晰利害遣使前去又恐策妄阿喇布坦心懷疑貳將兩路大兵盡行撤回乃伊因此愈生驕傲於定界一事妄欲侵占界地朕又向伊來使降旨云爾告知策妄阿喇布坦定界一事實於伊身有益如遵奉諭旨卽遣使具奏若不遵奉諭旨亦必遣使前來乃伊並不同奏此際策妄阿喇布坦身故伊之長子噶爾丹策零遣使前來奏聞伊父身故之事稱伊父已經成佛又稱欲使眾生樂業黃教振興等語噶爾丹策零不過邊遠部落一微末台吉耳使眾生樂業黃教振興豈應出之語耶况伊果欲求和應代伊父謝罪懇

恩送回青海叛逆潛逃之羅卜藏丹津以贖前愆乃並不輸誠向
化敢以如許妄誕之詞見之陳奏此特欲倣伊父之故轍耳聞噶
爾丹策零甚屬兇暴且西藏阿爾布巴隆布奈扎爾鼐等濟惡同
謀將實心爲國效力之貝子康濟鼐殺害此等叛逆罪狀皆因準
噶爾與伊處相近而逃去之羅卜藏丹津原係伊等姻戚彼此相
依迫其窘迫倉卒之時則必投奔準噶爾亦屬顯然因頗羅鼐奮
勇直前截其去路阿爾布巴等未得前進卽被擒獲準噶爾性好
搶掠若畱在眾蒙古游牧地方將來必受其害今朕已將來使遣
回若伊諸事俱遵旨陳奏臨時朕另行裁奪降旨儻仍前推諉矜
張肆恣負朕屢次遣使開導指示之仁恩抗玩不恭將來噶爾丹
策零斷非安分守法之人必至生事妄爲况西北兩三路大兵盡
已撤回此際伊等如或生事則我朝如許安享太平之喀爾喀等

及辦理安插妥帖之青海西藏必至被其擾害甚屬可慮且此事乃 聖祖皇考注意未完之事仰賴 上天眷佑 聖祖皇考福澤國帑充裕官員弁兵同心奮勇願爲國家效力實係可以舉行之會若遲疑不決定貽後悔夫用兵者國家不得已之事也窮兵黷武爲聖帝明王之所深戒而以大加小以強陵弱又仁人君子之所恥而不爲者況準噶爾彈丸之地又在極北之區得其土不足以誇耀武功此皆朕所熟思而詳審者也但畱此餘孽不行翦除實爲眾蒙古之巨害且恐爲國家之隱憂今天時人事機會輻輳時不可遲機不可緩天與不取古訓昭然且我 聖祖皇考爲此籌畫多年未竟其事茲當可爲之時朕不敢推諉亦不忍推諉此朕一人之見也用兵大事所關甚重不可輕率著諸王議政大臣九卿八旗大臣各抒己見公同詳確密議具奏尋議準噶爾部

落自噶爾丹逞兇悖逆策妄阿喇布坦復肆驕悍俱伏冥誅今噶爾丹策零兇頑踵惡若畱此餘孽則喀爾喀青海西藏等處必被其擾亂伏乞 皇上命將興師大彰天討以除蒙古人民之害得旨諸王滿漢文武大臣等眾議僉同一切應行事宜卽著辦理○甲午諭戶部農事爲國家首務督率貴有專司前有人條奏請於各省設立農官以司勸課或設巡農御史令其巡行郡邑勸助農人及時力作亦足敦本業而防游惰等語朕思各省耕作之情形不同未可一例通行見今畿輔之地營種水田以來收穫甚多行之已有成效設立巡農御史之事當先行於直省每年特差御史一員於二月田功初起之時巡歷州縣察農民之勤惰地畝之修廢以定州縣考成其有因循推諉以致荒廢農田者卽行參處該御史亦勤加勸課督令耕耘九十月間稼穡納場之後回京覆旨

至明年二月照例另派一員前往其該御史出巡一應供給車馬俱照見今巡察御史之例按日給發務使農業興修田功畢舉游手之人咸歸農畝以副朕重農務本之至意○諭鹽茶皆民生日用所必需查川省鹽課考成惟責之產鹽州縣其餘並無巡查之責且有僻遠地方不行官引以致私販充塞甚爲鹽政之弊應將官引通行合省約計州縣戶口之多寡均勻頒發令其各自招商轉運儻有壅滯責成各州縣定爲考成如此則有司等自必加意查察使私販息而官引銷弊端可以釐剔矣又聞川茶皆論園論樹以定稅額夫茶樹有大小不同園地有廣狹不一若概以園樹之數爲額未爲允當應將茶稅照斤兩收納方得其平以上二項著該督撫詳議定爲成例使川省鹽茶經理妥協於民生均有裨益○乙未 上御經筵○諭內閣從來天人感應之理捷於影響

凡地方水旱災祲皆由人事乖舛之所致或朝廷政事有所闕失
督撫有司不得其人或一郡一邑之中人心詐僞風俗澆漓又或
有一二大奸巨惡之徒滅棄倫常陰懷悖逆皆足以干天和而召
災異數年以來朕以此理曉諭內外臣工及萬方黎庶者不啻三
令五申矣乃湖南地方連歲屢遭荒歉朕以彼地之人事推之如
姦民謝錄正等逞兇肆惡潛蓄邪謀又有大逆之曾靜張熙等滅
絕天良性同梟獍地方有此等逆天悖理之人以致旱澇不時民
人困阨雖朝廷之政教頻施有司之職業無忝安能代兇惡頑民
祈禱天恩而寬其譴責乎楚風愚悍自昔爲然朕念率土之人皆
吾赤子同歸於善甚切殷懷著照浙江福建之例設觀風整俗使
一員勸諭化導之御史李徽著補授都察院僉都御史爲湖南觀
風整俗使○諭戶部錢爲國寶固貴流通以利民然必權衡輕重

使得其平方能便民用而無囤積私銷之弊近聞馬蘭峪地方奉天直隸數府錢價過賤民間貿易物價必致虧損且恐姦弊從此而生著該督及奉天府府尹嚴飭地方官通行曉諭嗣後錢價每銀一兩止許換大制錢一千文並著該部行文各省督撫轉飭各地方每銀一兩所換制錢不得過一千文俾民用便利而國寶流通以爲經久平準之定則○丙申諭內閣朕於興修闕里文廟一事盡誠盡敬頒發國帑務令規模宏壯堅固輝煌計日告竣雍正三年六月卽飭令原任巡撫陳世倌領帑興工遴員修造拳拳委託至再至三嗣於塞楞額接任之時又復諄諄訓諭豈料陳世倌委任不得其人旣已耽誤於前而塞楞額又復因循怠玩於後以致工程遲滯久未告成昨已遣通政使畱保前往協同署撫岳濬督催令在事人員殫竭心力迅速竣事陳世倌著速赴東省盡

心辦理以贖前愆此次修理 文廟工程務期巍煥崇閎堅緻壯麗纖悉完備燦然一新儻舊制之外有應行添設者有應加修整者俱著估計奏聞添發帑銀葺理丹牖工成之日朕當親往瞻謁以展尊禮 先師至誠至敬之意○丁酉以徐湛恩爲額外內閣

學士仍協理河南山東河工事務

由左僉都御史遷

○戊戌諭內閣各省

關口開放船隻向例有部頒號簿以便稽查茲聞各關另設私簿徵收報部時始將號簿挨日填造其意以船隻往來多寡不齊不能逐日有徵收之數目是以勻派填造如此則簿內數目與商船過稅串票毫不相符殊非政體且凡事據實則可以無弊作僞則弊竇叢生嗣後各關於部頒號簿務須據實填寫如無船隻過稅之日亦卽註明儻仍蹈前轍定行嚴加議處該部亦不得混行指駁致滋弊端○調彭維新爲吏部右侍郎王承烈爲刑部右侍郎

以張大有爲工部右侍郎性桂爲漕運總督

由左副都御史遷

○封圖爾

古特固山貝子丹中爲貝勒○己亥 上親耕藉田○諭內閣馬

蘭泰之祖明安原係厄魯特部落貝勒 太祖高皇帝時納款歸

順在軍中亦甚效力建立功勳授爲二等伯見今馬蘭泰承襲朕

念明安當年勞績格外施恩著封爲一等侯令馬蘭泰承襲世襲

罔替○諭本朝施恩功臣錫以世職俾其承襲罔替者特以念其

戰功不忍絕其禋祀使世世子孫永沾恩澤也但其中有因絕嗣

未經承襲者朕甚憫焉著怡親王尹泰常壽三泰將從前建功立

績之大臣官員內有絕嗣者查其近宗如無近宗則查其遠族並

其親戚儻宗族親戚全無卽於本旗內查其可令爲後者襲職再

太祖 太宗時因功所給之拜他喇布勒哈番以上等官內有

襲替幾世者不必概查其世襲罔替者悉行查明具奏○諭據朝

鮮國王奏稱伊國賊黨謀逆旋即敗露遣兵捕緝醜類全獲已正典刑等語朝鮮國世效恭順受朝廷怙冒之德伊國兇醜即係干犯天討之人該國王先事覺察不使漏網從此境內無警官民又安朕心深爲嘉慰茲因使臣回國著於常賜外加賜該國王緹段等四十匹內府書籍四種該國官員兵丁等發姦捕賊效力有功亦屬可嘉著頒帑銀一萬兩交與該國王分別賞給務令均霑以示朕旌賞之至意○庚子福建總督高其倬奏請揀發人員以備委用得旨高其倬向來不能教訓屬員以致閩省吏治廢弛朕前令各省督撫揀選州縣官一員咨送閩省朕又揀選能員陸續發往乃高其倬於屬員內悠忽瞻顧積習未除今又以知府同知缺出補用乏人題請揀發見今史貽直奉差閩省著會同高其倬劉世明將福建知府以下知縣以上各員優劣詳加甄別造冊具奏

嗣後閩省有道員同知缺出即可將優等之員題請補授其間朕或見有可用之人亦當命往補用○辛丑諭內閣浙省爲財賦重地民力輸將朕所軫念其舊欠錢糧非不欲開恩豁免止以屢年未完之項乃頑戶之所拖欠若以抗正供而霑膏澤則頑民獲利而良善轉未邀恩非所以化導人心風俗也今據性桂摺奏浙省紳士庶民咸能知朕教養之殷懷感朕訓誨之至意踴躍完納正賦卽此一事可以見其感恩遷善之誠朕實爲浙省之士民風俗稱慶非重此數十萬之國帑也浙省嚮善之速甚屬可嘉用沛鴻恩將雍正七年額徵地丁屯餉錢糧蠲免十分之二共計六十萬兩著李衛轉飭各屬恪遵奉行務使閭閻均霑實惠並將朕加恩獎善之意徧行宣諭俾遠鄉僻壤咸共知悉○癸卯四川巡撫憲德奏上年九月閒瀘州里民呈稱軍需米石情願捐助不敢領受

倉穀臣見永甯建昌各路軍糧於不能馬馱舟載之處俱派撥就近州縣里民背運負戴奔馳實屬勞苦而瀘州里民亦在派撥之內是以不便再令捐輸未允其請後據崇慶州里民具呈樂輸臣因崇慶未經派運故據情陳奏今奉旨蠲免該州一年額徵錢糧鴻恩丕布萬姓歡騰諭朕前見崇慶州紳衿士民好義急公風俗淳厚深爲嘉悅是以格外加恩蠲正賦以示獎勵今據巡撫臣憲德陳奏知瀘州里民曾經具呈在先且瀘民既有背運軍餉之勤勞又有樂助倉儲之忱惻雖撫臣未允所請而民情之忠厚善良實爲罕見著照崇慶州之例將雍正七年額徵錢糧全行豁免巡撫憲德務體朕心轉飭該州恪遵奉行使閭閻均霑實惠儻諭旨頒到之日有已徵在官者准其抵算庚戌年額賦○是月免江西安仁縣甘肅武威縣蘭州廳雍正六年被災額賦有差

三月乙巳朔諭內閣向來外官告病回籍不復起用朕從愛惜人材起見降旨令於該員告病之時該督撫若察其居官尙好卽於本內聲明俟病痊後赴部引見仍以原缺補用文職已有此例文武本屬一體以後武職告病者著照文職之例行○調孔毓珣爲江南河道總督以郝玉麟爲廣東總督

由雲南提督遷

○丙午諭內閣總

督田文鏡公忠歷練自蒞任豫省以來撫綏化導以實心爲察吏安民之本是以風清弊絕吏畏民懷地方舒暢之氣感召天和數年之中年穀悉登豐稔該督之功實爲可嘉兼該省紳士庶民風俗向來醇樸又能遵封疆大臣之教人人向義輸忠以受上天之恩實可謂良民矣夫因荒歉而蠲免正賦者乃賑窮恤困之意若羣黎共敦善行以迓天庥屢歲有秋災祲不作則賞善旌良朕之加恩沛澤更爲愉快著將豫省雍正七年額徵錢糧蠲免四十萬

兩總督田文鏡可確查分數通行所屬州縣一體遵奉使閭閻均
霑實惠朕廣收人材以資吏治每當保舉引見之時覺豫省之人
較少大約豫省士風器量謹愿有餘而才具明通不足今欲加以
策勵以備國家政事之用著田文鏡通行所屬府州縣選其才猷
可供任使者不拘人數資格秉公舉出該督再加遴選具題奏聞
送部引見又念中州之民務本力田勤於耕作著該督於常例歲
舉老農外再令所屬每處各舉一人給以八品頂帶以示優獎並
將朕旨曉諭遠鄉僻壤之民俾共知之○川陝總督岳鍾琪奏四
川雷波拉密結覺一帶蠻方廣袤千有餘里雷波土司楊明義與
米貼陸氏同惡相濟結連吞都土司德昌及阿路結覺阿照等處
逆蠻截糧傷兵負隅聚眾經四川提督黃廷桂遵旨率兵前進先
剿雷波繼破拉密旋攻結覺又平定平底噶阿路阿照等寨峒一

百餘處請以結覺地方歸沙馬土司管轄所獲番戶分建昌鎮永甯協管轄畱永甯夔州兵五百名令敘馬營遊擊帶領千把總五員暫駐雷波畱重慶兵三百名令忠州營守備帶領千把總三員暫駐黃螂以資防範得旨雷波等處苗蠻狂悖不法勾結惡黨騷擾附近民夷及官兵到日輒敢抗拒岳鍾琪等調度有方勦撫兼施俾兇犯全獲從此附近民夷咸得甯輯深屬可嘉辦理此事之大小文武官弁等著該部查明分別議敘○戊申諭內閣直省各處富戶其爲士民而殷實者或由於祖父之積累或由於己身之經營操持儉約然後能致此饒裕此乃國家之良民也其爲鄉紳而有餘者非由於先世之畱遺卽由於己身之俸祿制節謹度始能成其家計此乃國家之良吏也是以紳衿士庶中之家道殷實者實爲國家之所愛養保護則本身安可不思孳孳爲善以永保

其身家乎夫保家之道奢侈糜費固非所以善守而慳吝刻薄亦非所以自全周禮以鄉三物教萬民有曰孝友睦婣任卹可知公財行惠任卹之義與孝友而並重也蓋凡窮乏之人卽游閒破耗自困其生又不知己過轉懷忌於溫飽之家若富戶復以慳吝刻薄爲心腹削侵牟與小民爭利在年穀順成之時固可相安一遇歉荒貧民肆行搶奪先眾人而受其害者皆爲富不仁之家也逮富家被害之後官法究擬必將搶奪之貧民置之重典是富戶以斂財而傾其家貧民以貪利而喪其命豈非兩失之道大可憫惻者乎朕爲此勸導各富戶等平時當以體恤貧民爲念凡鄰里佃戶中之窮乏者或遇年穀歉收或值青黃不接皆宜平情通融切弗坐視其困苦而不爲之援手如此則居常能緩急相周有事可守望相助伎求之念旣忘親睦之心必篤豈非富戶保家之善道

乎從來家國一理若富戶能自保其身家貧民知共衛夫富戶一鄉如此則一鄉永靖一邑如此則一邑長甯是富戶之自保其身家富戶之宣力於國也况積善之家必有餘慶種福果於天地之間子孫必常享豐厚豈不美歟著各省督撫將朕此旨通行該屬之鄉紳士民人等共知之○戶部議准漕運總督張大有奏向年山東河南二省有輸運薊州遵化豐潤三州縣官兵需用米石其沿途管押以及回空催趲例責成於押運通判以一員而管領數幫前後不能兼顧請添設薊糧千總二員輪流領運抵薊之日交糧守候則責成於千總空船回次則責成於通判從之○雲貴廣西總督鄂爾泰奏丹江鷄講生苗自恃地險人眾不服招撫經新任撫臣張廣泗調遣官兵分路進剿苗眾投誠其上下九股及清水江古州等處見俱以次甯貼得旨古州等處生苗自古未歸王

化其人愚悍性成罔知法度自恃地形險峻出沒靡常擾害居民劫奪行旅雖無背叛之迹然爲地方良善之患亦不淺矣向來石禮哈等曾以招撫之事奏請朕怙冒萬方豈忍令此地苗蠻獨在教化之外祇以石禮哈非能辦理此事之人故未允其請續經鄂爾泰陳奏前來朕見新任巡撫張廣泗才具優長周詳縝密必能副朕委任是以諭令辦理今張廣泗親歷苗境勦撫兼施苗民懷德畏威莫不抒誠歸向使自古未服王化之地均得沾被朝廷之聲教鄂爾泰張廣泗及在事文武官弁俱著從優議敘其兵丁等著鄂爾泰將帑銀賞賚具奏○己酉吏部議准廣東總督孔毓珣奏瓊州一郡孤懸海外海口所城尤爲扼要商賈輻輳姦良易混請將瓊山縣縣丞移駐就近稽察得旨各省佐貳微員有地方職掌緊要者亦有新設新移正需料理者必須於眾員中揀選才具

稍優熟練事務之人方可勝任著各省督撫將佐貳緊要之缺查明具奏交與該部註冊遇有缺出該督撫揀選題請調補如本省乏員或將別省見任之員題補或請旨揀選永著爲例○庚戌署廣東巡撫傅泰奏監犯病故請按季彙咨以省煩瀆得旨審結定擬監犯病故隨報隨題著爲定例 聖祖仁皇帝臨御六十餘年未嘗更改所以慎重民命恐有獄卒陵虐滅口致斃等情也況廣東係山海交錯僻遠之區傅泰初任封疆於分內應辦之事尙未能周到何暇爲此越分陳奏之事且朕日理萬幾不敢稍自暇逸正冀爲大臣者贊襄鼓舞勵精圖治而傅泰奏稱章疏滋煩有瀆聖聽等語甚屬不合著將本擲還○命湖廣武卽等九府州武昌等十衛所丁銀攤入地畝內徵收○辛亥以嵇曾筠爲河南山東河道總督山東境內運河一併管轄

由吏部尚書河東副總河遷

○壬子戶部

議准四川巡撫憲德奏各省入川民戶向經一面造冊呈報一面
咨查原籍在案但愚民風聞給貲招墾往往輕於轉徙况川省田
地多經業主承丈自首將來餘荒多寡尙未可知不可不定以長
策請嗣後各省續到流民自雍正七年爲始停其造冊咨查行令
各省將實在無業窮民願往川省開墾者給與印照與先經查驗
覆到之各戶一體安插如無照之人除在川各有生業准其編入
保甲外所有游手之民著卽查明令回原籍從之○命江西開局
鼓鑄○甲寅諭內閣自古帝王皆有功德於民雖世代久遠而敬
禮崇奉之心不當弛懈其陵寢所在尤當加意防衛勿使褻慢至
於往聖先賢名臣忠烈其祠宇塋墓亦當恭敬守護以伸仰止之
忱著各省督撫轉飭各屬將境內所有古昔陵寢祠墓勤加巡視
防護稽查務令嚴肅潔淨以展誠恪若有應行修葺之處著動用

本省存公銀兩委員料理朕見歷代帝王皆有保護古昔陵寢之
敕諭而究無奉行之實朕於雍正元年恩詔內卽以修葺歷代帝
王陵寢通行申飭亦恐有司相沿積習視爲泛常嗣後著每年於
歲底令該地方官將防護無誤之處結報督撫該督撫造冊轉報
工部彙齊奏聞儻所報不實一經發覺著將該督撫及地方官分
別議處明太祖陵在江甯昔我 聖祖仁皇帝屢次南巡皆 親
臨祭奠禮數加隆著江南總督轉飭有司加意防護其明代十三
陵之在昌平州者自本朝定鼎以來卽設立太監陵戶給以地畝
令其虔修禋祀禁止樵採 聖祖仁皇帝屢頒 諭旨嚴行申飭
著該督轉飭昌平州知州昌平營參將差委人員時加巡視務令
地境之內清淨整齊儻陵戶或有不敷卽著該督酌量增添其南
北二處陵寢防護無誤之處亦著該督撫等於每年歲底冊報工

部彙奏○丙辰命領侍衛內大臣三等公傅爾丹爲靖邊大將軍北路出師川陝總督三等公岳鍾琪爲甯遠大將軍西路出師征討準噶爾○戊午諭內閣嘗思歲時雨暘之各地不同者其故或由於朝廷政事有所闕失或地方官吏乖其職守或民間習俗澆漓人心僞薄皆足上干天和致成災祲此理數之必然纖毫不爽者數年以來朕已諭之詳矣上年直隸通省地方收成豐稔惟宣化懷來保安三州縣獨愆雨澤朕心卽疑地方官民恐有招致之由秋間口北道王棠來京朕令進見曾經諭及今據王棠摺奏宣化懷來保安等處去年夏秋亢旱今春他處皆得瑞雪而此地獨少二月間臣因公出境勘得鷄鳴驛新保安之間有古惠民渠一道灌田數百餘頃旗民互訟歷三十餘年未曾結案臣詳勘渠道先剖曲直繼將上年所奉上諭再四宣布勸使同心一時旗民人

等項頌皇仁卽時感悟分渠共溉永息爭端果於三月初一二等日連降瑞雪平地尺餘春耕有賴萬民稱慶等語王棠此奏不過敷陳其事而實乃天人感應之至理蓋人之所以爲心卽天之所以爲心儻一方之中彼此猜嫌構爭起訟人懷不平之氣斯天地之氣亦湮塞於一方不能和暢寬舒有不雨暘失序者乎古聖有言萬方有罪罪在朕躬朕躬有罪無以萬方今朕此言非爲人君寬解而推卸其責於臣民也君民上下原爲一體嘗見直省督撫官員等每遇年歲豐登輒曰此皇上之洪福此語朕從不受朕無自私之福以天下之福爲福若吏治激清民風醇厚以致時和年豐天下人各受其福卽朕之福也若官吏壞法營私黎庶囂陵成習以致召爲災異此皆用人不得其當化導未盡其方天下不能共受其福卽朕之歉於福也人君原無可諉之責而臣民自有各

盡之道朕以實心實政乾惕於上天下臣民果能黷勉修省同歸於善以感召於下則太和之氣流行於宇宙閒災沴何自而生雨雪應時而降人歌樂利百室盈甯以同受上天之慈惠豈不美歟著各省督撫通行所屬咸使聞之○諭從前屢降諭旨禁止賭博京城內外稽察甚嚴聞游手不法之徒潛往通州天津公然犯禁聚賭其賭具之所從來有司亦不究問又如京城禁止宰牛鬪鷄及畜養鷓鴣等事而無賴之輩則於通州天津地方仍敢擅宰耕牛私開鬪局文武官吏漫無覺察又聞京城禁賭而好賭之人隨潛匿於四鄉無人禁約似此陽奉陰違有干法紀通州天津二處之人五方雜處易於容留匪類通州有倉場侍郎衙門又有副將駐紮均當與知州等一體管理稽查違禁等事儻不實心稽查致有疏縱朕差侍衛御史等拏獲定將該侍郎副將知州等分別嚴

加議處天津有總兵巡鹽御史及道員等官亦照通州之例行至近京鄉村中若有賭博等情該管汛地文武各員不得辭其責一經發覺決不寬貸○辛酉議政王大臣等遵旨議奏北路出征事宜一統領將弁應行派定京城八旗兵六千名自總統將軍外派副將軍參贊大臣前鋒統領等員其營總參領侍衛章京前鋒校護軍校驍騎校等均請派出以資差遣車騎營兵九千名應派總兵副將遊擊守備千總把總等員其押運糧餉大員隨印學士及中書司官筆帖式等均應派出奉天船廠察哈爾索倫土默特右衛甯夏七處共兵八千名應派統領及管轄之員至喀喇沁土默特兵八百名應派塔布囊等員率領一官兵起程分路定期北路官兵駐紮阿爾泰路途遙遠京城八旗兵於五六月閒分五路前進出口後令察哈爾土默特兵同行車騎營兵分六路前進奉天

船廠索倫右衛甯夏兵俱於六月起程至大兵駐紮處會合一北路官弁共計總統將軍一員副將軍一員參贊大臣六員前鋒統領一員副都統十員總兵二員營總二十四員參領副參領四十一員雲麾使一員副將四員章京一百三十六員中書二員司官十三員侍衛十二員參遊八員前鋒校十七員護軍校一百八十一員驍騎校一百三十九員筆帖式四十三員守備十六員千把總九十六員共七百五十三員除奉旨賞賚外分別各給馬駝器械跟役口糧鹽菜銀兩與兵丁糧餉等俱遵旨寬裕支給得旨振武將軍公巴賽著爲副將軍振武將軍印務著順承郡王錫保管理鑲黃旗滿洲都統侯陳泰右翼前鋒統領袞泰鑲白旗漢軍都統石禮哈正白旗滿洲副都統岱豪散秩大臣公達福正藍旗滿洲副都統覺羅海蘭俱爲參贊大臣原任右翼前鋒統領丁壽以

都統銜爲軍營前鋒統領直隸正定總兵官魏麟河南河北總兵
官閃文緒統領車騎營兵奉天副都統納秦統領奉天兵白都納
副都統塔爾岱副都統西彌賴統領索倫兵白都納副都統費雅
思哈統領甯古塔兵右衛副都統阿三統領右衛兵甯夏副都統
蘇圖統領甯夏兵鑲藍旗蒙古副都統承保鎮白旗滿洲副都統
常祿統領察哈爾兵歸化城副都統馬爾齊袞布統領土默特兵
塔布囊丹巴沙津達賴等統領喀喇沁土默特兵糧餉事務派法
敏伊都立巴泰西琳傅德等管理盛京禮部侍郎永國兼內閣學
士銜隨靖邊大將軍印前往北路軍營其辦理各款俱詳細妥協
悉依議行○乙丑諭內閣士子讀書明理爲庶民坊表若昧於急
公奉法之義抗糧逋賦是導民爲非不止虧缺國課而已今見內
外大小臣工爲此條奏者甚多經禮部定議按限追比逾限不完

詳請褫革嚴追等語朕思士子一經笞杖則難洗終身之辱一經褫革則永無上進之階諸生縱不自惜其身名朕則深爲諸生憫惜也聞各處催徵之例不同有責比催糧之差役者有撲責欠糧之本身者見年錢糧每至十月不完方將糧戶懲責是五月未經完半雖在百姓未必便行鞭撻而乃以此遽施於士子乎况生監之中貧富不等富戶故意抗違實法無可貸而貧生未能依限則情尙可原今應如何分別貧富使富者不得藉口以愆期貧者得稍紓其力霑沐朝廷體恤之恩而國賦又不至於拖欠久著該督撫各就本省情形秉公詳察悉心定議務期寬嚴得當永遠可行儻該督撫內別有所見可以仰副朕矜憐貧寒之士子而又懲戒頑富之劣衿者亦著詳悉陳奏○丙寅浙江總督李衛奏臣欽奉恩綸俯俞入覲所有各任印務謹遵旨酌量分派委署請以欽差清

查浙江錢糧副都御史性桂署浙江總督觀風整俗使蔡仕舫署浙江巡撫下部知之○改山西大同府歸化城理事同知屬朔平府轄○庚午戶部遵旨議准川陝總督岳鍾琪奏秦省自南山往蜀路徑有長安縣之子午谷蓋屋縣之黑水谷郿縣之斜谷三谷之中斜谷黑水谷俱極險僻無庸開鑿惟子午谷漢唐之時爲糧運大道後漸荒廢若將此路修鑿坦夷由西安徑抵漢江計程纔五百餘里最爲便捷但宜設兵防範以便行人請於子午谷內秦嶺南之五郎關設守備一千總二駐兵二百五十名秦嶺北之關神里亦屬隘口請就五郎關所設營內撥千總一兵五十名分駐其地其黑水谷內之柳葉河應添設把總一兵五十名再將鳳翔城守營兵移駐郿縣專防斜谷兼防桃川虢川等處其虢川應添設巡檢一千總一兵一百名從之○癸酉召吳昌祚來京調公元

爲山東按察使以陳世倬爲河南按察使

由開歸道遷

○甲戌命京官

有父母在籍抱病或年逾七十者不必六年俸滿准其歸省著爲令○改貴州中曹土司所轄高坡等處四寨歸貴陽府轄○是月免福建侯官等九縣甘肅平番縣雍正六年旱災額賦有差

夏四月丙子兵部議准巡察湖南御史王瓚奏驛站苗疆事宜一巴陵之岳陽驛近在縣城請歸併該縣管理其湖南橋頭鋪應另設一驛卽以岳陽驛丞移駐一湖北武昌府進京大路由河南信陽州中間楊店驛小河司廣水李家寨等處民居稠密道里平坦請將黃陂孝感雲夢安陸應山及平靖關原設夫馬酌量抽撥改置驛遞五站以便往來一楚俗熟悉符呪有作奸犯科惑世誣民者請照光棍例治罪得旨此本內議稱熟習符呪之人照光棍例治罪而未議及通行曉諭之後方照此例定擬甚屬疏漏從前

屢降諭旨凡有改定科條須寬其期限悉令家喻戶曉而猶有不率教者加以嚴懲始不爲枉今法司更定律例而不示以遵行之期是謂不教而殺且地方官亦有難於奉行之處著另議具奏尋議應自雍正庚戌年爲始犯者爲首立斬爲從擬絞監候行令該地方官徧行曉諭從之○丁丑吳達禮緣事革職以陳福壽爲盛京工部侍郎由郎中遷○福建總督高其倬遵旨題覆原任臺灣府鳳山縣知縣蕭震向因命案遲延經前撫臣題參革職查蕭震居官勤力人亦樸直但因伊父母年俱八十時時思憶精神漸減以致辦理不及從前請革職畱任得旨凡官員等有父母年高而補授路遠地方者經朕聞知皆曲體其情改用近地使之便於迎養或得音問時通蕭震既有八旬之父母該督撫卽應據實陳奏俾得遂其私情專心辦理公事方爲大臣愛養人材之道乃隱不奏聞

致罹削職甚爲屈抑蕭震著回籍省親後來京赴部引見朕再降諭旨○庚辰吏部議覆署貴州巡撫沈廷正奏永豐州所屬冊亨羅斛地方甚屬遼闊一切命盜案件俱係知州辦理未免稽遲請鑄給冊亨州同羅斛州判關防各一令其專司仍令該州兼轄從之○禮部題遵旨議建雲師雷師廟宇查唐天寶間增雷師於雨師之次每歲立夏後申日致祭宋元因之大明集禮增雲師於風師之次郡縣立雷雨壇於稷壇西風雲壇於社壇東又明會典所載秋分後三日合祭雲雨風雷等壇今雷師廟應建於西方立夏後申日致祭雲師廟應建於東方秋分後三日致祭從之○刑部遵旨議奏盜賊被獲應定同居處分之例以絕盜源請嗣後有犯強竊之案者其同居之父兄叔伯明知爲匪或分受財物許卽據實出首均准免罪本犯亦得照律減免如不先行出首其不分贓

而知情者照知人謀害他人不行首告律杖一百若知情而又分
贓照本犯罪減一等發落自雍正庚戌年爲始通行督撫轉飭地
方官曉諭遵行從之○辛巳諭內閣直省各處皆有回民居住由
來已久其人旣爲國家之編氓卽俱爲國家之赤子原不容以異
視也數年以來屢有人具摺密奏回民自爲一教異言異服且強
悍刁頑肆爲不法請嚴加懲治約束等語朕思回民之有教乃其
先代畱遺家風土俗亦猶中國之人籍貫不同嗜好方言亦遂各
異是以回民有禮拜寺之名有衣服拜寺之別要亦從俗從宜各
安其習初非作奸犯科惑世誣民者比則回民之有教無庸置議
也惟是凡人生產雖不同地而同具此天良習尙雖不同教而同
歸於爲善回民處天地覆載之內受國家養育之恩可不孜孜好
善共勉爲醇良乎且朝廷一視同仁回民中拜官受爵游登顯秩

者常不乏人則其勉修善行守法奉公以共爲良民者亦回民之本心也要在地方官吏不以回民異視而以治眾民者治回民爲回民者亦不以回民自異卽以習回教者習善教則賞善罰惡上之令自無不行悔過遷善下之俗自無不厚也如陝省之回民較他省尤多其販私聚賭私藏兵器種種不法之案屢出較他省回民爲甚又如奉旨禁宰牛隻乃勸民務農勤稼所以重惜力耕之物命聞回民頗有怨言且有私自屠宰者此卽居心殘忍不務本奉法之一端也朕念萬民一體之義豈忍視回民與眾民有殊特此詳加訓誨爲回民者當知率由禮義講讓興仁毋恃強而陵弱毋倚智而欺愚儻自謂別爲一教怙惡行私則是冥頑無知甘爲異類憲典具在朕豈能寬假乎自茲以後父戒兄勉姻婭族黨互相箴規盡洗前愆束身向善以承天地覆載之恩以受國家教養

之澤豈不美歟直省各督撫等務宣布朕意咸使聞知○吏部議准四川巡撫憲德遵旨覆奏天全土司改設流官事宜一天全地方請改置一州設知州一吏目一駐紮碉門州同一分駐始陽一天全地方既改爲州應隸府轄請升雅州爲府設知府一經歷一增置附郭一縣設知縣一典史一以新設之一州一縣及名山榮經蘆山等三縣併歸府轄一雅州既改爲府請以州學爲府學改設教授一州訓導改爲府訓導其府州縣三學取進生童並廩增出貢額數統俟人文日盛再議增置從之尋定天全新改州曰天全州雅州新升府曰雅州府雅州附郭縣曰雅安縣○侍郎銜在學士裏行走登德以老疾乞休允之○降厄魯特扎薩克郡王阿寶爲貝勒以其擅移住遊牧地方故也○丙戌諭大學士九卿等朕觀近日兵部奏事其中有一二件似欲迎合朕意者夫朕日理

萬幾初無絲毫成見於胸中惟期有當於大公至正之理已曾屢降諭旨爾等諸臣自應持正秉公悉心斟酌事事以當理爲準庶政治有所裨益今乃於正理之外妄爲揣摩則爾等焉能知朕意之所在而漫思迎合乎且部院所辦之事各有關繫如吏部有意迎合則銓選不公戶部有意迎合則財賦難理此皆有妨於政治者其爲害猶小至若刑部職在明刑關繫最重儻稍以迎合爲心則生死出入之間刑罰必不得其平上千天和下戕民命其害尙可言乎至於辦事之道凡人精神智力用之專一則詳明而得理用之紛雜則叢脞而多乖數年以來朕於辦理政務之時皆聚精會神專於所用如閱一本則專閱此本而不思其他治一事則專治此事而不及其餘是以志氣清明條理昭著一事旣畢自可再辦一事至於政務稍暇中懷澂澂之時又不可放逸此心朕於此

時必將在京部院衙門及在外各省之事一一思維詳察由一部以及各部由一省以及各省靜中默識更覺端緒易尋所以辦事甚多而不至於遺忘者此也朕以一人之精神辦理天下之事而常覺有餘爾等諸臣以數人之精神辦理一部之事又何慮不足乎諸臣其共勉之○以和善署盛京戶部侍郎

由內閣侍讀學士署

申珠渾

署盛京禮部侍郎

由大理寺少卿署

○議政王大臣等議准川陝總督岳

鍾琪奏四川巴塘裏塘等處請授宣撫司三員安撫司九員長官司十二員給與印結號紙副土官四員千戶三員百戶二十四員給以職銜以分職守內巴塘裏塘正副土官原無世代頭目承襲請照流官例如有事故開缺題補至各番錢糧正項之外又有供給喇嘛衣單土官蠻兵頭目口糧雜糧等項未便仍令將弁等私自徵納請統作正賦收催從之○丁亥移湖北荊州徐關於田家

洲更名田關○戊子諭戶部國家承平日久戶口日繁凡屬閒曠未耕之地皆宜及時開墾以裕養育萬民之計是以屢頒諭旨勸民墾種而川省安插之民又令給與牛種口糧使之有所資藉以盡其力今思各省皆有未墾之土卽各省皆有願墾之人或以日用無資力量不及遂不能趨事起功徘徊中止亦事勢之所有者著各省督撫各就本地情形轉飭有司細加籌畫其情願開墾而貧寒無力者酌動存公銀穀確查借給以爲牛種口糧俾得努力於南畝俟成熟之後分限三年照數還項五六年後按則起科總在該督撫等董率州縣因地制宜實心經理務使田疇日闢耕鑿維勤以副朕愛養元元之至意○庚寅命倉場侍郎劉於義山西按察使葛森清查西南軍需錢糧○以原任太僕寺卿涂天相署倉場侍郎仍復刑部左侍郎原銜○辛卯吏部議准雲貴廣西總

督鄂爾泰奏雲南東川府治地方遼闊前經題准於巧家營地方增設會澤一縣但該縣距府五站小民輸納維艱請改爲東川府附郭其東川經歷請分駐巧地並設立一汛撥官一員兵三十名以資防守從之○壬辰諭內閣外任督撫藩臬爲全省之表率關係甚重每當簡用之時常以一時不得其人深勞念慮凡內外大臣受國家厚恩均當留意於平時秉公奏薦盡以人事君之道京官自學士侍郎以上外官自藩臬以上著各人密保一人將其人可勝督撫之任或可勝藩臬之任據實奏明不必拘定滿漢亦不限定資格卽府縣等員官階尙遠者果有真知灼見信其可任封疆大僚亦准列於薦牘之內若一時無深知可舉之人准其從容採訪不得草率塞責有負諮詢○移廣西思恩府同知駐土田州百色地方改潯州府通判爲思恩府通判駐古零裁太平府全茗

土州吏目一南甯府果化土州吏目一宣化縣那龍寨巡檢一添設桂林府永甯州喇崗巡檢一南甯府宣化縣三官堡巡檢一橫州大灘巡檢一○癸巳諭內閣山東巡撫岳濬著前往西安送伊父岳鍾琪領兵起程再回原任巡撫印務著山東布政使費金吾暫行署理○甲午以吏部尙書查郎阿署川陝總督○復設江南南匯縣下砂二場浙江黃巖縣杜瀆場永嘉縣永嘉場場官各一裁江南金山衛浦東場場官一○乙未以申珠渾爲左副都御史仍署盛京禮部侍郎○復設膠萊分司運判一○丙申諭內閣前降旨令兵部將因公註誤降級革職之武弁查出具奏今日兵部查得三十六員具摺請旨摺內有施仁宥過等語此等浮泛頌揚有乖理道之詞昔年 聖祖仁皇帝屢經指示訓誨而數年以來朕又以之誥誡內外臣工者不啻至再至三矣蓋賞罰者天命之

正人君奉天出治有善則賞有過則罰其柄非人主所得私也至其中亦有遇過而寬宥者則以其事本有可原之情或其人尙有可用之才故姑從寬典以許其自新耳夫人君惟令天下無一夫不獲其所方可謂之仁非縱釋奸宄遂可以謂之仁也不能化導百姓而使之不爲奸宄已不可謂之仁矣若再務施仁之名而爲姑息養奸之事則匪類肆行無忌良善固不能安枕而不良之人無所懲戒悛改將見犯法者愈衆是陷之入於邪惡之路也不仁孰甚焉施仁宥過四字若不能通曉其義用違其當則流弊無所止極卽如今日兵部具奏請旨之三十餘人將來引見時豈皆可以起用若有不用者則是有不施之仁有不宥之過矣朕豈受此名乎朕治天下惟有教養兼施勸善懲惡此外非朕之所知也兵部侍郎楊汝穀胡煦並非不曉文義者且日侍班聯熟聞朕諭尙

昧昧至此則外省疏遠之臣工必更不能體會朕意也著將兵部

堂官嚴加申飭並曉諭內外大臣官員知之○戊戌黃國材緣事

革職以李永陞爲工部尙書由都統遷○纂輯律例成○己亥命高其

倬來京陞見以史貽直署福建總督由吏部左侍郎署○裁奉天府泰甯

縣知縣典史教諭各缺○辛丑升陝西肅州爲直隸州兼轄高臺

一縣裁肅州通判○壬寅 上以征討準噶爾告祭 太廟○命

馬會伯往肅州辦理軍需以趙宏恩署湖北巡撫呂耀曾署四川

布政使尤清署四川按察使由鹽驛道遷○甲辰諭內閣朕荷 天地

鴻恩俯垂眷佑寤寐之中對越 神明之心至誠至恪每見臣工

奏章有山川效靈等字輕慢 神祇朕心深切不安屢經降旨申

飭今衍聖公孔傳鐸奏賀慶雲本內仍用乾坤效靈字樣想未見

朕歷來誠諭之旨耶衍聖公爲 先師後裔服習家訓拜疏陳詞

朕歷來誠諭之旨耶衍聖公爲 先師後裔服習家訓拜疏陳詞

尤宜合理此本著更改另行繕寫具奏○諭兵部振威將軍揚武將軍印二顆送往西安交與大將軍岳鍾琪軍前有應用之處酌量委用○兵部議覆福建總督高其倬參奏休致海澄公黃應纘因承襲公爵賄屬該縣出結應革去職銜令該撫究擬具奏得旨黃應纘係告休之員承襲世職乃伊家事未免瞻顧私情若地方有司平日不開賄賂之門慣行勒索則黃應纘亦何至以財請託罹於罪戾是其罪全在知縣張渭烈張珂等也今欲得受賄情由應將知縣二人嚴加審訊便可定案黃應纘之祖父忠勳懋著若以承襲之事致干黜革朕心不忍黃應纘從寬免革職銜○是月免江南徐州甘肅河州平涼等三州縣被災額賦有差

五月丙午諭內閣屢年以來朕以天人相感之理諄諄曉諭內外臣工益朕實切敬天勤民之念於寤寐之中而確見其感應之

不爽尤願各省督撫有封疆之重任者體朕此心至誠至敬各盡其道以爲感格上天之本惠我蒸民共登衽席朕並非以年穀之順成有意歸美於大吏亦非以雨暘之差忒強欲卸責於臣工也假使爲督撫者因朕有地方豐歉由於吏治得失之諭旨而欲自彰其善自護其短於奏報秋成或有溢美之詞於奏報歉收或有諱災之意則事天爲不誠事君爲不忠臨民待下爲不仁不信有此數端而欲荷上天嘉祐錫福凝禧有是理乎况粉飾一己之聲名而不顧民生之休戚其何以對所屬之官民而無愧忤乎朕畱心體察覺近來督撫等之奏報年穀閒有此弊不得不通行曉諭以防其漸在爾督撫等返躬自思有則改之無則加勉况朕之見聞甚廣訪察維勤儻掩飾於此而敗露於彼豈不自取朕之輕視乎人臣事君之道惟以誠實無欺爲本爾督撫臣其共勛之○戊

申諭內閣朕見臣工等奏章閒有用山川效靈洪福齊天及一切
頌揚背理之詞諄諄訓誡至於再三宜乎中外共知朕心矣乃昨
衍聖公孔傳鐸奏賀慶雲本內竟用乾坤效靈之語朕覽之實爲
悚惕不甯之甚朕於事 天事 神至誠至敬惟望 天地神祇
俯鑒默佑錫福兆庶共享昇平若云感召天和或云受天之佑或
云昭示靈應似此等語作頌揚之文尙於義不悖而於心亦安今
乃謂天地神祇效靈於人君豈不聞王者父天而母地而敢爲此
褻慢之語乎且朕之事 天亦猶臣下之事君也臣之視君也以
爲九重之尊而以人君視天其相越之分又不啻九重而已也設
以屬員頌其上官而稱爲上所崇奉或稱爲福與君齊彼爲上官
者能安受而不戰慄乎今以效靈齊天等語見諸奏章何以異是
不惟不知立言之體亦大失敬謹事君之道矣昔我 聖祖仁皇

帝深惡此等陳奏之詞常加訓誨今著再行申諭內外臣工知之嗣後如有仍用此等字樣者著通政司卽行參奏如送內閣卽著大學士參奏○己酉諭大學士九卿自古爲政者皆言寬嚴相濟所謂相濟者非方欲寬而雜之以嚴方欲嚴而雜之以寬也惟觀乎其時審乎其勢當寬則寬當嚴則嚴而已如十人當賞則俱賞之斷無以賞太多而舍一二人不賞之理十人當罰則俱罰之斷無以罰者太多而寬一二人不罰之理卽如戶部也綜核錢穀惟在公平直省徵解錢糧其不足者固當查覈若餘於額數之外者豈遂不當查覈乎卽如刑部也按律定罪務期明允直省審讞重案其閒失出者固當駁詰若失入而致冤抑者豈遂不當駁詰乎總之寬嚴適協其宜乃爲相濟非參雜於寬嚴之閒而爲子莫之執中也譬之飲食原相需也然亦當飲而飲渴者不可以食解當

食而食飢者不可以飲充若強飢者以飲強渴者以食是相背也
豈相需之道乎○辛亥諭內閣朕慎重民命畱心刑獄每於讞決
之際往復審察至再至三是以外省每年秋審亦照朝審之例悉
令三覆奏聞今思每日所進本章內有擬以極典及斬絞立決之
犯雖其情罪俱屬重大律無可寬然朕心猶欲慎審而後置之於
法嗣後如遇此等本章已閱過票籤交與本房者著批本官員照
三覆奏之例進呈三次候朕再加詳慎然後批發以副朕欽恤矜
慎之至意○命直省老農改爲三年一舉○四川巡撫憲德奏富
波阿照等處苗民七百餘戶內附○癸丑 上幸南苑○孫卓以
年老降太常寺卿以傳德爲禮部右侍郎由大理寺卿遷○移湖南湘潭
縣縣丞駐朱亭市○甲寅 上閱車騎營兵於南苑○丁巳諭內
閣向來有司官補授之時回避本省蓋因地方密邇恐其中有嫌

疑牽制等弊也朕思江南之上江下江湖廣之湖北湖南陝西之西安甘肅雖同在一省中而幅員遼闊相距甚遠定制各設巡撫司道以統轄之其情形原與隔省無異則官員選補不過有同省之名而並無嫌疑牽制之處况既係同省則於彼處人情土俗較他省之人更爲熟悉未必不於地方有所裨益嗣後凡江蘇安徽湖北湖南陝西甘肅諸處府州縣以下官員得本省之缺不在本籍巡撫統轄之內者不必令其回避其相隔在五百里之內者仍照隔省回避之例一體遵行○戊午吏部議覆湖廣總督邁柱奏湖南保靖桑植永順三土司新經改土爲流請於永順東南之舊司治西北之江西寨各設知縣一典史一田家崗施溶州隆頭地方各設巡檢一其永順原設大喇司巡檢裁保靖之舊司治設知縣典史各一張家壩設巡檢一其保靖原設同知裁桑植以南原

屬九谿衛之安福所應歸併桑植合爲一縣添設知縣典史各一
以上分設四縣應設知府一管轄並設經歷一俱駐紮永順其永
順原設同知移駐喜鵲營專督永保新設二縣捕務桑植原設同
知改爲通判移駐江西寨專督安福所江西寨新設二縣捕務再
永順請設副將一卽將桑植副將移駐立爲永順協並設守備一
千總二把總四兵八百名保靖設遊擊一卽將永定營遊擊裁改
立爲保靖營並設守備一千總一把總二兵四百名俱聽永順副
將轄桑植應於九谿協撥守備一千總一把總二兵三百名駐防
聽九谿協節制從之尋定永順新設府曰永順府永順東南新設
縣曰永順西北新設縣曰龍山保靖新設縣曰保靖桑植新設縣
曰桑植○庚申諭內閣凡遠省煙瘴之地及沿海之區因其險阻
荒涼或民情難治是以有司缺出或揀選補授或將內地之員保

題調補該員到任之後有歷俸三年卽升者亦有五年卽升者所以恤其苦而賞其勞加恩於常格之外也乃向來督撫等徇情受託往往庇護私人以保題煙瘴邊缺爲名俾得速於升遷仍將其人委署近地展轉留滯而本任意屬虛懸是以緊要之缺轉成閒曠之所矣近年以來雖州縣正印官不敢仍蹈故轍而同知通判等員則聞尙有借委署他處之名不到本任延至數年俸滿居然得以升遷者此等弊端甚有關繫嗣後著嚴行禁止儻有應行署理之處著該督撫就近差委不得使屬員巧爲規避之計儻有仍前營私作弊者經朕查出定將該督撫及本員一併從重議處○四川提督黃廷桂奏黃螂土司國保呈請歸流情詞懇切應行具奏請旨得旨各處土司呈請改土爲流者朕俱不允屢降諭旨甚明今據黃廷桂奏黃螂土司國保屢次具呈懇請題達據稱祖遺

土地多被鄰封侵占兼以轄屬愚頑難以管教惟恐貽累子孫等語朕念該土司國保素知遵奉法紀自會勦米貼軍興以來隨營效力更爲恭順其所轄土兵亦無助逆惡蹟今屢次懇請改土爲流旣於伊身及其子孫有益朕不忍違其所請著給與守備職銜並賞銀五千兩爲立產安居之用其願居何處著該提督向伊詢問悉心酌議善爲安插俾其永遠得所以副朕懷○壬戌諭內閣自本朝開國及平定三藩廓清朔漠褒忠錄功之典最爲優渥凡文武官弁兵丁之效力行閒著有勞績及臨戎致命遇敵受傷皆赤心報國之人朝廷沛澤加恩惟恐不逮乃近年以來部臣辦事遲緩因循往往因一二事之駁查遂將眾人卹賞之典俱致淹滯卽如陝甘川省從前攻勦南川北川青海桌子山等處之文武官弁兵丁已經查覈明晰應行卹賞議敘止因青海等處功加冊結

內有原任巡撫王景灝同知張梅革職離任所造冊結無印可鈐部議駁查以致南川等案卹賞之處一併稽延經朕察訪而後知之夫官弁例應議敘者不得早沾國恩固爲不可而陣亡受傷人等遲至數載之後尙未邀帑金之賜尤可憫惻著該部速行卹賞議敘嗣後凡有出兵加恩之案其中若有應行駁查者止將應查之人扣除俟查明補給不得因一二人之行查而稽遲眾人應得之恩典將此永著爲例又如從前進藏出征之官弁兵丁若有豫借銀兩而本身陣亡或在軍中受傷病故者除照例卹賞外其所豫借銀兩概免追還○甲子諭戶部朕聞各省糧船過淮抵通之時該管衙門官吏胥役人等額外需索陋規以致繁費甚多運丁重受其累特命御史前往稽查禁革苛索等弊又查向來之例每船北上許帶土宜六十石朕思旗丁運駕辛苦若就糧艘之便順

帶貨物至京貿易以獲利益亦情理可行之事著於舊例六十石之外加增四十石准每船攜帶土宜一百石永著爲例惟是運丁人等繁多素有惡習如偷盜米石挂欠官糧夾帶私貨藐視法紀此向來之通弊也又如昔年浙江湖廣二省糧船因私忿小怨遂致操刀持戈殺傷多命又從前偶值回空守凍遂致縱容水手公然搶奪擾害居民此皆朕所共知者是以數年以來內外臣工條奏旗丁不法者不下數百紙前又有奏稱販賣私鹽之弊在糧船爲尤甚有一種積梟巨棍名爲風客慣與糧船串通搭載貨物運至淮揚託與本地姦徒令其賣貨買鹽豫屯水次待至回空之時一路裝載其所售之價彼此朋分糧船貪風客之餘利風客恃糧船爲護符於是累萬盈千直達江廣私販日多而官引日滯等語觀此則旗丁之作奸犯科誠難以悉數也朕年來屢飭該管官嚴

行禁約又復念其勞苦疊沛恩膏近見伊等之惡習刁風亦漸俊改是以特頒諭旨嚴禁過淮抵通苛索之陋規復令增添攜帶土宜俾得多沾餘潤以贍家口伊等益當感戴朕恩遵守法度共爲良善以免罪愆著總督倉場侍郎漕運總督將朕此旨通行刊布每船各給一張使運丁人等觸目儆心以副朕體恤訓誨之至意○乙丑先是湖南靖州人曾靜因考試劣等家居憤鬱忽圖叛逆遣其徒張熙詭名投書於川陝總督岳鍾琪勸以同謀舉事岳鍾琪拘畱刑訊究問指使之人張熙甘死不吐岳鍾琪置之密室許以迎聘伊師佯與設誓張熙始將曾靜供出岳鍾琪具奏併其逆書奏聞奉旨差刑部侍郎杭奕祿正白旗副都統覺羅海蘭至湖南會同巡撫王國棟拘提曾靜審訊據曾靜供稱生長山僻素無師友因應試州城得見呂畱良評選時文內有妄論夷夏之防及

井田封建等語遂被蠱惑隨遣張熙至浙江呂畱良家訪求書籍
呂畱良之子呂毅中授以伊父所著詩文內皆憤懣激烈之詞益
加傾信又往訪呂畱良之徒嚴鴻逵與鴻逵之徒沈在寬等往來
投契因致沈溺其說妄生異心等語隨將曾靜張熙提解來京旋
命浙江總督李衛搜查呂畱良嚴鴻逵沈在寬家藏書籍所獲日
記等逆書並案內人犯一併拏解赴部命內閣九卿等先將曾靜
反復研訊並發看呂畱良日記等書據曾靜供稱前因輕信呂畱
良邪說被其蠱惑兼聞道路浮言愈生疑罔致犯彌天重罪今蒙
一一訊問並發呂畱良日記等書極其狂悖又知 聖朝深恩厚
澤 皇上大孝至仁心悅誠服自悔從前執迷不悟萬死莫贖今
乃如夢初覺等語因俯首認罪甘服上刑內閣九卿等備錄供詞
進呈 御覽諭內閣九卿等我朝肇造區夏 天錫人歸 列聖

相承中外從乂述我 聖祖仁皇帝繼天立極福庇兆民文治武功恩施德教超越百王普天率土心悅誠服雖深山窮谷庸夫孺子以及凡有血氣之倫莫不尊親詎意逆賊呂畱良者悍戾兇頑好亂樂禍自附明代王府儀賓之孫追思舊國憤懣詆譏夫儀賓之後裔於親屬至爲疏賤何足比數且生於明之末季當流寇陷北京時呂畱良年方孩童本朝定鼎之後伊親被敎澤始獲讀書成立於順治年間應試得爲諸生嗣經歲科屢試以其浮薄之才每居高等盜竊虛名誇榮鄉里是呂畱良於明毫無痛癢之關其本心何曾有高尙之節也乃於康熙六年因考試劣等憤棄青衿忽追思明代深怨本朝後以博學鴻詞薦則詭云必死以山林隱逸薦則薙髮爲僧按其歲月呂畱良身爲本朝諸生十餘年之久乃始幡然易慮忽號爲明之遺民千古悖逆反覆之人有如是之

怪誕無恥可哂可鄙者乎自是著邪書立逆說喪心病狂肆無忌憚其實不過賣文鬻書營求聲利而遂敢於聖祖仁皇帝任意指斥憑虛撰造公然罵詈所著書文以及日記等類或鐫板流傳或珍藏祕密皆人世耳目所未經意想所未到者朕繙閱之餘不勝惶駭蓋其悖逆狂噬之詞凡爲臣子者所不忍寓之於目不忍出之於口不忍述之於紙筆者也夫普天之下莫非王土率土之濱莫非王臣呂留良於我朝食德服疇以有其子孫者數十年乃不知大一統之義其日記所載稱我朝或曰清或曰北或曰燕或曰彼中至致逆犯吳三桂書亦曰清曰往講若本朝於逆藩爲鄰敵者然何其悖亂之甚乎且吳三桂耿精忠乃叛逆之賊奴人人得而誅之呂留良於其稱兵犯順則欣然有喜惟恐其不成於本朝疆宇之恢復則悵然若失轉形於嗟歎於忠臣之殉難則汚以

過失且聞其死而快意不顧綱常之倒置惟以助虐迎寇爲心不顧生民之塗炭惟以兵連禍結爲幸何呂畱良處心積慮殘忍兇暴至此極也又如僞永厯朱由榔竊立於流寇之中在雲貴廣西等處其衆自相攻劫貽禍民生後兵敗逃竄緬甸順治十八年定西將軍愛星阿等領兵追至緬城先遣人傳諭緬酋令執送朱由榔大軍隨至城下緬人震懼遂執朱由榔獻軍前此僞永厯之寶蹟豈有被執時滿漢官兵轉於伊馬前皆跪之事瞽說荒唐誕謬極矣總之逆賊呂畱良於本朝實有徵應之事蹟則概爲隱匿而不書而專以造作妖誣快其私憤又文集內云今日之窮爲義皇以來所僅見等語夫明末之時朝廷失政貪虐公行橫徵暴斂民不聊生至於流寇肆毒疆場日蹙每歲餉千百萬悉皆出於民力乃斯民極窮之時也我朝埽清寇氛與民休養於是明代之窮民

咸有更生之慶逮我 聖祖仁皇帝愛育黎元海內殷庶黃童白
叟不見兵革蠲租減賦之政史不勝書久道化成休養生息六十
餘年民安物阜卽考義皇以來史冊所紀屈指而數蒙 上天之
眷佑可以比並我朝之盛者不可多得而乃云義皇以來未有之
窮乎又日記所載怪風震雷細星如彗日光磨盪皆毫無影響妄
捏怪誕之處甚多總由其逆意中幸災樂禍但以捏造妄幻惑人
觀聽爲事其失實不經皆不顧也夫災異亦古所時有 上天垂
象原以儆戒人君令其修省進德若以捉影捕風之語指爲災異
傳諸後世或謂從前太平盛世尙有如此非常奇怪災異儻遇日
月星辰水旱之變必生輕忽漫不經心凡所以啓後世人君之怠
玩者其罪可勝言乎其他猖狂悖亂之詞令人痛心疾首者不可
枚舉呂留良生於浙省人文之鄉讀書學問初非曾靜山野窮僻

冥頑無知者比且曾靜止譏及於朕躬而呂留良則上誣聖祖
皇考之盛德曾靜之謗訕由於誤聽流言而呂留良則自出胸臆
造作妖妄是呂留良之罪大惡極有較曾靜爲倍甚者也朕向來
謂浙省風俗澆漓人懷不逞如汪景祺查嗣庭之流皆以謗訕悖
逆自伏其罪皆呂留良之遺害也甚至民間氓庶亦喜造言生事
如雍正四年內有海甯平湖闔城屠戮之謠比時驚疑相煽逃避
流離者有之此皆呂留良一人爲之倡導於前是以舉鄉從風而
靡甚至地方官吏怵其聲勢之囂陵黨徒之叢盛皆須加意周旋
優禮矜式以沽重儒之譽如近日總督李衛爲大臣中剛正之人
亦於到任之時循沿往例贈送祠堂扁額况他人乎此其陷溺人
心濁亂世俗害有不可勝言者數年以來朕因浙省人心風俗之
害可憂者甚大早夜籌畫仁育義正備極化導整頓之苦心近始

漸爲轉移日歸於正若使少爲悠忽不亟加整頓則呂畱良之邪說誣民者必致充塞膠固於人心而不可解而天經地義之大閑泯沒淪棄幾使人人爲無父無君之人矣今日天道昭然惡貫時至今其奸詐陰險盡情敗露則不容不明正其罪以維持世教彰明國法且呂畱良動以理學自居謂己身上續周程張朱之道統夫周程張朱世之大儒豈有以無父無君爲其道以亂臣賊子爲其學者乎此其狎侮聖儒之教敗壞士人之心眞名教中之罪魁也朕卽位以來實不知呂畱良有著述之事而其惡貫滿盈神人共憤天地不容致有曾靜上書總督岳鍾琪之舉曲折發露以著呂畱良之兇頑而呂畱良之子如呂葆中者曾應舉成名蒙恩拔置鼎甲仕列清華其餘子孫多遊庠序乃不卽毀板焚書以滅其蹟且前此一念和尙謀叛之案黨羽連及呂葆中其時逆蹟早

已彰著蒙 聖祖仁皇帝如天之仁免其究問而呂葆中遂憂懼以死就常情而論呂葆中之兄弟子孫遇如此之驚危險禍且荷蒙 聖祖仁皇帝如此高厚洪恩尤當感激悔悟共思掩覆前非以爲倖逃誅殛之計豈料冥頑悍驚習與性成仍復抱守遺編深藏笥篋此固呂畱良以逆亂爲其家傳故世惡相承罔知儆惕而實乃天道昭然不容少昧使逆賊之陰謀徹底呈見於今日逆賊之遺毒不致漏網於天誅也曾靜逆書朕已洞悉知外間逆黨頗眾竟有散布訛言希圖構亂者然其所詆惟朕之一身朕可以己意自爲判定歸結若如呂畱良之罪大惡極獲罪於 聖祖在天之靈者至深至重卽凡天下庸夫孺子少有一綫之良亦無不切齒而豎髮不欲與之戴履天地此亦朕爲臣子者情理之所必然應將已故逆賊呂畱良及見在子孫嫡親弟兄子姪照何定例治

罪之處著九卿翰詹科道會議直省督撫提督兩司秉公各抒已見詳覈定議具奏○以對琳爲內閣學士由郎中遷○裁陝西涼州府平番縣西大通驛驛丞一添設縣丞一兼管驛務其沙井一驛改隸蘭州轄○辛未諭內閣自古明目達聰之道欲以周知庶務博採羣情其責端在於臣工之襄贊然必公正居心斯能以忠言讜論裨益政治苟或植黨營私辯言亂政此倡彼和顛倒是非實國家之罪人爲王章所不宥嘗觀前明季世一二新進後生竊居言路遂朋比固結挾制大臣把持朝政以致國是日非而不可挽此其炯鑒也我 世祖章皇帝 聖祖仁皇帝聖神御極大觀在上言路宏開羣邪屏息一切猖狂澆薄之風早已翕然丕變雖有不肖之徒亦無能施其伎倆矣朕卽位以來以公聽並觀爲務以納忠廣益爲先旣命滿漢文武大臣指陳政務又命科道等於露章

之外准具密摺奏事蓋以國家事務殷繁人情弊端種種諸臣有陳奏之心或有不便顯言之處故令密封進呈所以免其瞻顧去其嫌疑俾得各抒所見盡言無隱庶國計民生均有攸賴又如國家任事出力勤領素著之大臣所辦公務既多豈能保其無所錯誤若因此而被指摘殊非情理其他偶罹過愆或其子弟家人生事失於覺察一經彈劾若朕不加處分則近於護庇若加以處分則彼之宣力甚多而不能恕其一眚朕心實爲不忍不若言事者密陳朕前待朕爲之斟酌輕重訓誨區處亦兩全之道凡此皆須出於至公至當方有裨益於風俗人心非使不肖言官藉密奏以自便其私也乃營私植黨之徒竟欲以此逞其奸黠甚或密行告訐詆毀大臣撓亂國政此風斷不可長朕是以降旨停止科道官之密摺止令各用露章蓋以其在大廷廣眾之間自不敢挾私心

而昧公道也乃復有公然紊亂黑白顛倒是非輒欲輕變舊章擅作威福者其餘則摭拾陳言苟且塞責又或相率而爲依違緘默之計竟未見一人一事實有所建白裨益於國計民生者夫以朝廷耳目之官視國家之政治如陌路而又欲以進諫之美譽歸之於己以不能納諫之名歸於君上忍心害理莫此爲甚言官以進言爲職豈容以國家之事沽一己之名朕之廣開言路者實欲以眾人之耳目爲朕之耳目使民隱得聞萬事就理並非邀虛懷受諫之名博建韜置鐸之頌也乃向來科道官密奏之弊如此近來露章之習又如此中外所共知共見者朕不得不再三訓飭言官有補闕拾遺之職庶幾痛改頽風洗滌故習盡謹言獻替之道成蕩平正直之風科道不愧諫議之官國家得收納言之效儻復蹈昔年故轍則有害而無益矣著傳諭科道等嗣後條奏事件著如

文武大臣等輪班具奏○壬申諭廣東督撫聞粵東地方四民之外另有一種名爲蜑戶卽搖蠻之類以船爲家以捕魚爲業通省河路俱有蜑船生齒繁多不可數計粵民視蜑戶爲卑賤之流不容登岸居住蜑戶亦不敢與平民抗衡畏威隱忍跼蹐舟中終身不獲安居之樂深可憫惻蜑戶本屬良民無可輕賤擯棄之處且彼輸納魚課與齊民一體安得因地方積習強爲區別而使之飄蕩靡甯乎著該督撫等轉飭有司通行曉諭凡無力之蜑戶聽其在船自便不必強令登岸如有力能建造房屋及搭棚棲身者准其在於近水村莊居住與齊民一同編列甲戶以便稽察勢豪土棍不得借端欺陵驅逐並令有司勸諭蜑戶開墾荒地播種力田共爲務本之人以副一視同仁之至意

六月甲戌朔封土默特塔布囊沙津達賴爲輔國公○添設浙江

台州府屬之海門前所家子三江口新亭章安道頭江口汛等處
礮臺巡船○乙亥諭朕前所批岳鍾琪奏摺偶檢幾件發與曾
靜看朕與岳鍾琪君臣之際一德一心在岳鍾琪之忠誠報國公
正無私實自古大臣中所罕見而朕以至誠御下恩眷大臣亦極
倚任之優崇洵爲上下交孚明良盛事且朕所批岳鍾琪奏摺甚
多此不過數十分中之一分而摺內加恩岳鍾琪之處亦不過百
分中之一分而曾靜乃欲上書勸之謀反豈非醉生夢死冥頑無
知之人乎此乃天道不容令其自行敗露也查曾靜逆書內有傳
聞岳鍾琪兩次進京陛見俱不允行岳鍾琪深自危疑因而上書
等語曾靜平昔夷狄之見橫介於胸中又聞此無根之語不覺其
逆心之愈熾遂爲此孟浪之舉但此傳聞之說必有所自來著曾
靜確實供出以曾靜之所犯如此大罪今尙蒙朕之寬宥則傳說

浮言者若能悔改亦必從寬貸况傳說者未必卽爲造言之人若由曾靜供出之人轉究造言之緣起則此事可得歸結著杭奕祿海蘭詳悉宣示曾靜欽此○丁丑諭內閣游惰之民自昔治天下者所深惡若賭博之人又不止於游惰而已荒棄本業蕩廢家貲品行日卽於卑污心術日趨於貪詐父習之則無以訓其子主習之則無以制其奴鬪毆由此而生爭訟由此而起盜賊由此而多匪類由此而聚其爲人心風俗之害誠不可以悉數也凡爲不善之事者雖干犯功令猶可得微利於一時獨至賭博則今日之所得明日卽未必能保若合一年數月而計之勝者與負者同歸於盡此人所共知者無如邪僻之人一入其中迷而不悟數年以來屢次降旨嚴禁而此風尙未止息者以尙有製造賭具之人而有司之禁約未盡力也百工技藝之事可以獲利營生者何事不可

爲而乃違禁犯法製此壞風俗惑人心之具其罪尙可言乎嘗思賭博之風所以盛行者父兄爲之子弟在旁見而效之家主爲之奴僕在旁見而效之甚至婦人女子亦沈溺其中而不以爲怪總因習此者多故從風而靡者眾也假若嚴行禁止使人不敢再犯則日積月累此風自然止息無俟條教號令之煩也凡地方大吏有司均有化民成俗之責而乃悠悠忽忽視爲泛常安辭溺職之咎今特定本地官員勸懲之法以清其源嗣後拏獲賭博之人必窮究賭具之所由來其製造賭具之家果審明確有證據出於某縣將該縣知縣照溺職例革職知府革職畱任督撫司道等官各降一級畱任如本地有私造賭具之家而該縣能緝拏懲治者知縣著加二級知府著加一級督撫司道等官著紀錄二次將此勸懲之法永著爲例該督撫通行曉諭○理藩院奏達賴喇嘛之父

索諾木達爾扎奉表進貢方物得旨索諾木達爾扎乃達賴喇嘛之父指教達賴喇嘛學習經典保護達賴喇嘛勤勞多年西藏之事毫不干預甚屬可嘉著封爲輔國公○戊寅實授樓儼廣東按察使○己卯解楊鯤任以唐執玉署直隸總督由左都御史署○靖邊大將軍公傅爾丹奏兗州右營車兵李中倫拾有銀兩驗係皇賞情願歸還失主隨經查訪係北樓營車兵韓吉玉遺失驗看相符願歸拾取之人李中倫復堅辭不受應加獎賞得旨講讓與廉最爲美俗而師旅出征尤以人和爲貴今李中倫拾取遺金知爲恩賞軍士之物卽時稟知該管將弁情願給還本人似此見利思義同心同力之忱惻甚屬可嘉著賞銀六十兩以示嘉獎並傳諭內外直省兵丁等果聞風慕義共敦善行必仰蒙上天之賜同受國家之恩矣○甲申科道巴德保等遵旨將輪班條奏之處公同酌

議仍以無庸輪班合詞具奏得旨據爾等科道奏稱不敢輪班密奏者誠恐拘於班次限於奏期無可條陳摭拾細事冒瀆聖聰等語朕見諭部院旗下文武大臣輪班條奏其所言果皆摭拾細事冒瀆朕聰乎如爾等以輪班密奏爲摭拾細事冒瀆朕聰則輪班爲不可行矣旣不可行則文武大臣之輪班條奏爾等卽當奏請停止乃又緘默不言何也據爾等奏稱皇上於天下之事無不周知辦理妥協等語朕於天下之事無不周知者以進言之路廣也若如爾等之無所陳奏朕雖欲周知天下之事其可得乎爾等職司言路此所奏不合著另行定議具奏○裁廣東惠州府碣石衛守備一添設惠州府海防軍民同知一駐紮碣石衛裁海豐縣南豐平安二驛驛丞各一添設巡檢二分駐河田汕尾地方改東海客驛丞爲東海客巡檢併歸新設海防同知轄○乙酉諭內閣朕

愛養黎元遐邇一體而邊遠之地小民家計不及近省尤朕心之所繫念數年以來甘肅四川雲南貴州廣西五省有用兵西藏及勦撫苗蠻等事其一應軍需皆動用公帑備辦秋毫不派及於民間有糧餉轉輸亦有資於民力今藏地苗疆俱已甯謐朕心嘉慰特沛恩膏著將庚戌年甘肅四川雲南貴州廣西額徵地丁銀兩悉行蠲免其西安各屬地方近日亦有豫備軍需之事朕心軫念著將庚戌年額徵錢糧蠲免十分之三此六省督撫大吏宜仰體朕心轉飭所屬有司敬謹奉行務使閭閻均沾實惠如有奉行不力被不肖有司暗飽私囊或奸胥土棍強劣紳衿包攬侵蝕者經朕訪聞必將通省大小官員分別從重治罪至於國家設官本以理民官有恤下之責民有奉上之義若設官而不爲計及養廉之資則有司之賢者將窘迫而莫能支不肖者又橫取而無所檢是

以酌定將錢糧耗羨均給各官此揆情度理上下相安之道但思
加恩百姓豁免正賦若將耗羨一併蠲除是民雖邀額外之恩而
官員轉有拮据之苦上司或因此稍有寬假則必致巧取苛索於
民流弊種種轉多於耗羨之數於吏治民生均無裨益著於庚戌
年爲始凡遇特恩蠲免錢糧者其耗羨仍舊輸納諒必民所樂從
若因水旱蠲免者不得徵收耗羨將此永著爲例○丙戌諭內閣
浙江逆賊呂留良凶頑梗化肆爲誣謗極盡悖逆迺其逆徒嚴鴻
達者實爲呂留良之羽翼推尊誦法備述遺言又從而恢張揚厲
以附益之其詞有較呂留良爲尤甚者夫呂留良以本朝諸生追
附前明儀賓之末裔無端反噬憤懣猖狂已屬從古亂臣賊子中
所罕見至若嚴鴻達自其祖父已爲本朝之編氓踐土食毛戴高
履厚嚴鴻達之於明代豈有故君舊國之思而於我朝實被遂生

樂育之澤何所庸其感憤何所庸其追憶而亦敢效顰乎茲擇其悖逆之語一併宣示日記有云索倫地方正月初三日地裂橫五里縱三里初飛起石塊後出火近三十里內居人悉遷避又云熱河水大發淹死滿洲人二萬餘又云十六夜月食其時見眾星搖動如欲墮狀又或飛或走羣向東行又云舊年七月初四日星變欽天監云此星出天沛垣入天市垣分野屬吳越有兵起於市井之中凡此荒唐叛逆之語自康熙五十五年至雍正六年內所記載者不勝枚舉其中惟索倫地方擁石出火實有之事蓋彼地氣脈使然前此已經屢見其旁遠近山頂亦有烈燄者而嚴鴻逵以此爲譏訕乎至熱河發水一事因此地山回巒抱中惟一道河流每雨水稍大眾水所匯或致衝決隄岸康熙四十八年六月大雨連晝夜其時附近行宮一帶地處高阜惟隔岸山根之下爲水所

漫溢本地久居之民及扈從之官兵皆知雨止水卽減退安重不
遷惟寄居之匠人等驚惶迷惑或有愚人編木爲筏謂可乘流而
渡遂有木筏觸石而解沈溺者數人是時朕以輪班恭請 聖安
隨從官員二三百人駐紮卽在水發之地因約束嚴整無一妄動
之人及至水退皆安然無恙無一人被水者乃嚴鴻逵謂淹死滿
洲人二萬餘何妄誕至於斯極且熱河之地五方之人畢集而嚴
鴻逵謂獨淹死滿洲有此理乎嚴鴻逵生今之世爲今之民明代
淪亡已久而我朝定鼎業經百年有餘乃臆造譌言好亂樂禍於
昇平甯謐之時作干戈擾攘之望以 聖祖之德盛化神而公然
誣蔑以今日之民安物阜而朝夕呪詛種種喪心病狂皆拾呂留
良之唾餘而尤加幻妄豈非兇逆性成萬死有餘之逆賊乎且伊
又貌作迂腐曲謹之態浮薄之士簣鼓其虛譽致有廷臣以纂修

明史薦舉及伊者伊乃自鳴得意抗慢詭激其自記有云予自意
定當以死拒之耳其大言藐抗若此又云衡州人張熙字敬卿來
見言其師曾靜永興縣人在彼中講學學者稱蒲潭先生從前因
讀講義始棄諸生夫以朕特旨詔修明史旁求山林隱逸之士而
廷臣薦舉及伊至欲以死力拒竟視朝廷如兒戲等徵召於弁髦
而於逆賊曾靜等叛亂悖惡之徒尺書馳問一介相通則數千里
之外呼吸相應招納黨類天地間顯圖不軌擾亂綱常未有兇狡
至於此極者也似此悖逆叛亂之人煽惑民心且獲罪於聖祖
皇考與呂畱良黨惡共濟其罪不容於死嚴鴻逵應作何治罪之
處著九卿翰詹科道會同速議具奏○戊子諭內閣我朝建極綏
猷遐邇率育海隅日出莫不尊親乃逆賊呂畱良嚴鴻逵兇悖惡
亂無父無君著書顯爲謗訕於本朝之大統肆爲詆斥之詞於我

聖祖仁皇帝之深仁厚澤偉烈豐功任意爲誣蟻慢詛之語其猖狂妄幻肆無顧忌人人痛心疾首不共戴天朕已降諭旨將伊等極惡大罪之處宣示中外諸臣公議治罪至於嚴鴻逵之徒沈在寬生於本朝定鼎數十年之後自其祖父已在覆幬化育之中非止身被德教者可比綱常倫理之大義尤當知懷乃墮惑逆黨之邪說習染兇徒之餘風亦懷不逞附會詆譏慕效梗化之民稱本朝爲清時竟不知其身爲何代之人狂悖已極此沈在寬與呂畱良嚴鴻逵黨同叛逆之彰明較著者也至其所著詩集有云更無地著避秦人又云陸沈不必由洪水誰爲神州理舊疆此以本朝之宅中立極化理邽隆目爲神州陸沈有同洪水之患其謬戾尤爲狂肆且卽以洪水言之明代二百餘年黃運兩河時時潰決生民日有淪爲波臣之懼我 聖祖仁皇帝時廩憂勤詳示方略

躬親相度至於再三凡所以修築捍禦之策疏濬導刷之宜悉

經 睿慮精詳盡美盡善以致川流循軌黃水安瀾數十年來隄

工鞏固億姓永無昏墊之虞共享平成之慶迨朕紹膺丕緒恪遵

謨烈加意修防仰荷 上天眷佑七年以來河流咸歸故道海

口深通清淮迅暢三省運道邁行無阻至於北直畿輔之地南省

浙江等處凡有海塘河渠以及應行經理水利之處皆漸次興修

蓄洩以時旱潦有備府事修和桑麻徧野此時之神州何處可指

爲陸沈又何地可指爲洪水乎且沈在寬云誰爲神州理舊疆其

意欲將神州付之何人經理也沈在寬年未滿四十而亦效其師

之狂悖肆詆本朝乃於逆賊曾靜之徒張熙千里論交一見如故

賦詩贈答意同水乳此其處心積慮以叛逆爲事其罪實無可追

著交與刑部將沈在寬訊取口供具奏○復設廣東廣州府東匯

關批驗所大使一添設饒平縣東界場陽江縣雙恩場大使各一
裁新甯縣雉崗場大使一併歸海晏場大使兼管○癸巳諭內閣
浙江總督李衛之母汪氏訓子成名壽逾大耋前已降旨照伊子
尙書品級給與封誥以昭特恩今伊子來京陛見未及回任遽聞
溘逝深爲憫惻著賜祭一壇令署督性桂致祭李衛著給假兩月
料理伊母喪事其各任印務暫著性桂蔡仕舫等照前署理○諭
刑部前因直隸盜案往往多於他省是以降旨令將直隸盜案仍
照舊例不分首從皆斬後因定例伊始鄉僻愚民未必人人盡知
若一概置之重辟於心實爲不忍是以將直隸盜案亦暫照各省
盜案分別斬決發遣二項歸結原冀愚頑之輩感恩畏法遷善改
惡共爲良善之民也乃年來直隸盜案雖似略減而仍復不少且
有所得贓物甚微非積盜行劫數次之人而甘心罹於重法者朕

推原其故必係地方有司未將從前首從皆斬之諭旨剴切詳明通行曉諭是以伊等罔知儆懼復蹈前轍用是再頒此旨著直隸總督徧行曉諭自庚戌年爲始直隸境內再有爲盜劫之事者定照首從皆斬之舊例行如地方官仍疏忽從事不明徧行曉諭將來事發一併嚴加治罪○甲午賑江西大庾南康二縣水災饑民○丙申諭刑部等衙門聞得外間訛傳六月二十四五將開屠宰耕牛之禁回子等俱欲齊來謝恩等語又聞民間竟有私宰耕牛之事此必姦人造爲訛言誘人犯法以撓禁令也凡朕所降旨禁約者事事皆欲濟民之用厚民之生無一事爲朕之私心使用而設也如禁用黃銅所以裨益鼓鑄流通國寶朕豈別有需用黃銅之處乎如禁賭博所以端人心而厚風俗賭博之爲害於人心風俗朕已屢降諭旨甚詳且悉非愚頑不移之輩無一人不以禁

約爲當也至於禁宰耕牛以耕牛爲農田所必需墾田播穀實藉其力世間可食之物甚多何苦宰牛以妨穡事乎今朝廷所需除祭祀照例供用其餘亦一概不用牛肉矣年來自禁用黃銅之後而錢價漸平民用頗利矣自禁賭博之後而開場聚眾者亦略知畏懼斂迹矣自禁宰耕牛之後而農家向日數金難得一牛者今已購買易而畜牧蕃矣可見利益民生之事亦既行之有效爲良民者必皆知朕大公愛民之心爲良有司者必能實心遵朕愛民之政惟百姓中有回子一類以宰牛爲業試思貿遷有無百工技藝何業不可營生而必欲爲此犯禁傷農之事國家亦豈肯因一二游手回民無理之營生而令妨天下萬民之生計夫朕所禁之事必審度再四灼見其必應禁止然後見諸施行豈有旋禁旋開朝三暮四之理乎今訛傳宰牛開禁之語必係爲匪姦徒造作言

語煽誘愚民使之犯法而於中取利甚屬可惡著該部步軍統領
順天府府尹五城御史等通行曉諭京城直省並嚴行查訪如有
違禁私宰耕牛及造爲種種訛言希圖煽誘者立即鎖拏按律盡
法究治如該管官不實力嚴查致有干犯者定行從重議處○已
亥陝西總督岳鍾琪奏陝屬設立社倉一事懇請特頒諭旨恭錄
鐫石又擬列社倉條約並請刊刻木榜以昭程式得旨朕惟國家
建立社倉原令民間自行積貯以百姓之資糧濟百姓之緩急其
春貸秋償及滋生羨息各社自爲經管登記地方有司但有稽查
之責不得侵其出納之權此社倉之古法也是以各省有請立社
倉者朕皆令其聽從民便毋得強勒捐輸繩以官法以致便民之
舉轉爲民累所以曉諭各省督撫者不啻至再至三矣從前岳鍾
琪在京時請於通省加二火耗內應行裁減每兩五分之數且暫

行徵收發與民間採買穀石分貯社倉俟採買數足卽行裁減是於暫收耗羨之中隱寓勸輸之法實則應行酌減之耗羨卽小民切己之貲財而代民買貯之倉糧卽小民自捐之積貯此藏富於民之良法最爲切實而易行是以俞允所請令其辦理乃陝省官員不知此項穀石本係民貲又未識從前岳鍾琪奏請之由以爲收貯在官卽是公物不肯付民經管而胥吏司其出納者遂有勒買勒借之弊殊非數年以來朕之周咨詳盡多方生養斯民本意矣今特降諭旨將朕允從岳鍾琪之請並岳鍾琪陳奏原委明白曉示著署督查郎阿巡撫武格刊石頒布俾各州縣鄉社小民咸知朝廷經營設法之蓋藏實百姓自爲斂散之資用儻地方官有於社倉穀石勘議交官不交百姓或指稱原係公項豫爲公事侵那之地者俱以擾撓國政貽誤民生論從重治罪其岳鍾琪所擬

社倉條約著戶部鈔錄交與該督撫分發各州縣刊刻木榜於各鄉社倉豎立以爲永久程式○庚子吏部議覆直隸布政使王馨奏各省藩庫俱設庫大使一官秩雖微職掌甚重向例以吏員銓選人品不一請照鹽大使例將候選知縣州同州判縣丞等揀補給與八品職銜與按察使知事等官較俸升轉從之○辛丑諭內閣據順承郡王錫保以在軍前效力之謝濟世註釋大學毀謗程朱參奏前來朕觀謝濟世所註之書意不止毀謗程朱乃用大學內見賢而不能舉兩節言人君用人之道借以抒寫其怨望誹謗之私也其註有拒諫飾非必至拂人之性驕泰甚矣等語觀此則謝濟世之存心昭然可見朕卽位以來於用人之際至公無私不惟可以自信亦天下臣民所共知者卽以田文鏡謝濟世二人之事言之田文鏡在 聖祖仁皇帝時爲內閣侍讀學士朕從未識

其面亦並未知其姓名因雍正元年伊奉差祭告華山回京陛見將山西通省荒歉情形急切陳奏備極周詳朕以山西被災其時之巡撫德音身在地方既不奏聞而田文鏡以奉差經過之員念切民瘼直言無隱其忠君愛國之忱惻深屬可嘉遂令田文鏡前往山西撫綏賑濟伊到彼果能盡心辦理於是將伊授爲山西布政使令與諾岷和衷共濟嗣因河南諸事廢弛調任河南布政使未幾擢爲河南巡撫見今授以河東總督之任一二年間深加信任尙可謂之見賢而不能舉舉而不能先乎又如李紱蔡珽與黃振國邵言綸汪誠等結黨行私營求報復而謝濟世姦惡很戾聽其指使參奏田文鏡貪贓納賄任意誣讎借直言敢諫之名行其排擠傾陷之計朕當謝濟世陳奏之時立即洞燭其奸拏交刑部審問朕尙未忍置之重典著令革職發往軍前效力贖罪一時在

廷諸臣無不以爲至公至當似此尙可謂之見不善而不能退退而不能遠乎至於朕心並無私好私惡惟以其人之善惡爲好惡以眾論之是非爲好惡何常豫存成見於胸中卽如引見各官有見其才具似優者亦令該上司試看有見其人似屬平常者亦令該上司試看並諭令該上司秉公考課不必存迎合瞻顧之念是以各員莅任之後或朕旨曾獎其優而督撫參劾者多有之或朕旨以爲平常而督撫保題稱職者亦有之朕未嘗以一己之好惡令天下督撫以阿徇而各督撫亦能仰體朕意從未嘗以朕之好惡漫爲迎合也朕之用人惟期有益於國計民生者可謂之好人之所惡惡人之所好乎謝濟世於公正任事之田文鏡則肆行誣參於婪贓不法之黃振國以及黨護鑽營之李紱蔡珽邵言綸汪誠等則甘聽其指使而爲之報復乃直顛倒是非紊亂黑白好惡

拂人之性者矣天理國法所不能容舊已逮身而猶不知省懼何其謬妄至於此極夫拒諫飾非之說乃朕素所深戒然必責難陳善忠言讜論而後可以謂之諫若乃排擠傾陷之私言奸險狡惡之邪論豈可以直諫自居而冀朕之聽受耶試問謝濟世數年以來伊爲國家敷陳者何事爲朕躬進諫者何言朕所拒者何諫所飾者何非除處分謝濟世黨同伐異誣陷良臣之外尙能指出一二事否乎謝濟世以應得重罪之人從寬令其效力乃仍懷怨望恣意謗訕甚爲可惡應作何治罪之處著九卿翰詹科道秉公定議具奏○以王廷揚爲戶部右侍郎

由通政使遷

○壬寅諭廣西省在

京官員據廣西學政衛昌績奏稱粵省風俗澆漓而紳士實爲倡首卽該省鄉紳之在京居官候補者亦稱本地紳士庶民湔洗積習未能驟除應設觀風整俗使以司化導等語朕觀廣西乃邊遠

小省通籍於朝者本不多人而其中卽有謝濟世陸生枏者狂悖
囂陵目無法紀則該省風俗之薄劣卽此可見矣今御史陳宏謀
等請照衛昌績所奏設立觀風整俗使獨不思爾等紳士乃兆庶
之觀瞻閭閻之坊表若爾等果能於忠孝禮讓之道身體力行以
爲眾人之模楷而又各教訓其子弟各規勸其鄉黨則小民慕義
嚮風觀感興起風俗自日歸於醇厚若不能端本激源躬先表率
而望秉鐸司教之官家諭戶曉使之改過遷善易俗移風所謂逐
末而忘其本也爾等各思嘉惠桑梓貽福子孫當於己身自求之
○癸卯裁陝西鄜州三川驛延長縣文安驛清澗縣石觜驛綏德
州義合驛吳堡縣河西驛驛丞各一潼關縣遞運所長武縣停口
遞運所大使各一○是月免甘肅安定平涼二縣雍正六年雹災
額賦有差